

# Carta Que Dicjin Pablo Para Ixin Chojni Que Ditticaon Jesucristo Ngain Ciudad De Roma

## *Pablo chjé joajna chojni ngain Roma*

<sup>1</sup> Janha Pablo, ná ninchehe xé Jesucristo. Dios nichjahna janha co joantsjenda na para rrihi ná representanté jehe, para rrindattjan icha chojni joajné jehe que danjo iná vida naroaxin.

<sup>2</sup> Desde anto osé Dios ndačo joajna jihi ngain cain profeté, co jehe profeta cjin joajna jihi ngain tti libro que jitaxin Palabré Dios.

<sup>3</sup> Jehe joajna jihi tti jinichja de ixin Jesucristo, Xenhe Dios. Co para nntihi ngataha nontte, Jesucristo mero razé rey David.

<sup>4</sup> Pero para ixin ngajni, Espíritu Santo ndačo que Jesucristo Xenhe Dios, tti chonda cain joachaxin, ixin jehe xechon de tti ndavenhe.

<sup>5</sup> De ixin Jesucristo, Dios chjana na joachaxin para que te na representanté jehe para que ngain cainxin nación, sintte chojni que sitticaon Dios co sinchehe na inchin jehe rinao.

<sup>6</sup> Ngayé cain chojni jihi, te ra jaha ra cai, xó nichjaha ra Dios para goan ra chojni Jesucristo.

<sup>7</sup> Mexinxin janha rricjinha ra jaha ra, xó te ra ngain ciudad de Roma, jaha ra xó Dios anto rinao ra, co nichjaha ra para sintte ra ngain ná vida jian para ixin Dios. Jehe Dios Ndodá na, conixin

Jesucristo, tti chonda cain joachaxin para ixin ján na, cayoi nimé ni sinttanchaon ra co sanjo nganji ra tti çhjoin que tsonohe ansean ra.

*Pablo rinao sitysjehe chojni ngain Roma*

<sup>8</sup> Saho, de ixin Jesucristo, janha chjaha gracias ngain Dios para ixin cainxin jaha ra ixin cainxin parte de ngoixin mundo tenichja chojni de ixin tti jaha ra ditticaon ra ngain Jesucristo.

<sup>9</sup> Co Dios, tti xé rrinttaha janha conixin ansenna ixin rrindattjan chojni tti jian joajné Xenhe Dios, jehe Dios nohe jian quexén janha xaxanho jaha ra cainxin nttiha que janha rrinttacoanxian Dios.

<sup>10</sup> Janha cain tiempo rrinttatsán ñao Dios para que jehe rrochjana joachaxin para que jai janha nchao saso sasotsjaha ra.

<sup>11</sup> Ixin janha rinaho sicon ra co tsjenguijna ra de ngain tti ditticaon ra de ixin Jesucristo para que sitticaon ra icha jian;

<sup>12</sup> rroçho para que sonttoanimá chó na conixin jehe tti dotticaon na jihi de jaha ra conixin janha.

<sup>13</sup> Hermanos, janha rinaho que jaha ra tsonoha ra que tsje nttiha janha joinaho rrogaso para rrogasotsjaha ra, pero hasta jai xa çhoha. Janha rinaho saso nttiha Roma para sinttaguitticaon chojni nttiha de ixin Jesucristo inchin jointtaha ngain icanxin parte de ngoixin mundo.

<sup>14</sup> Ixin Dios coetonna janha ixin chonda que sinttanoa cainxin chojni, sea griego o jeha griego; o chojni que chonxin jian, o chojni que xonhi chonxin.

<sup>15</sup> Mexinxin jañá janha anto rinaho rrondattjo ra cai tti joajna que danjo iná vida naroaxin, jaha ra xo te ra ngain ciudad de Roma.

*Joachaxin que chonda tti joajna jian*

<sup>16</sup> Janha tsooanaha de rrondattjan chojni tti jian joajné Jesucristo ixin mé joachaxín Dios para sanjo iná vida naroaxin ngain cain tti chojni que ditticaon joajna mé. Icha saho chojni nichja joajna jihi jeho ngain chojni judío, pero jai, cai nichja na ngain chojni que jeha judío.

<sup>17</sup> Ixin joajna jihi tjagoa na quexén Dios nttaroa na ngattoxon con jehe. Co jehe nttajian na de ixin tti confianza que ján na chonda na ngain Jesucristo, co jeho ixin chonda na confianza mé. Jamé ndacho ngain tti jitaxin Palabré Dios cai: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida naroaxin.”

*Tti teca chojni ngain Dios*

<sup>18</sup> Ján na docon na ixin tti anto soji castigoe Dios ttixin de ngajni para ngain chojni que jeha jian co nchehe na inchin jiquininxinha. Ixin tti jianha que chojni mé nchehe tanchjandaha que rrochonxin na tti ján ndoa.

<sup>19</sup> Cain chojni mé nohe na jian quexén rrochonxin ni de ixin Dios, ixin jehe Dios mismo cjoagoe na.

<sup>20</sup> Ixin desde que Dios joinchechjian mundo, cain chojni nchao chonxin na cosa de Dios que choha dicon ni, ixin nchao chonxin ni ixin tti joachaxin que jehe chonda xonhi tiempo tsjexin, co ni jehe Dios xonhi tiempo tsjexin. Co jihi

jehe ni nchao satsoan ni de ixin ngain cain tti dinchechjian Dios; mexinxin cain tti chojni que ditticaonha ngain Dios, jehe sinchetjañeha cain chojni mé, ixin ¿quedonda ditticaonha na?

<sup>21</sup> Co cain chojni mé masqui chonxin na jihi de ixin Dios, nchesayeha na inchin jiquininxin jehe, ni danjoha na gracias ngain jehe. En lugar de sinchehe na mé, jehe na joxon ðaxaon na cosa que ðonhi xé, co jamé naxin xehe para joarrixaoen na.

<sup>22</sup> Masqui ndaço na que jehe na anto nohe na, pero jeha ndoa, ixin jehe na ðonhi chonxin na.

<sup>23</sup> Ixin en lugar de rrojinchesayehe na Dios, tti ndoa jian, co tti ðonhi tiempo ndasenhe, jehe na nchesayehe na retratoe chojni que ndadenhe, co hasta retratoe conttoa, conché co icha coxigo nchesayehe na.

<sup>24</sup> Mexinxin Dios ndacointtohe na para nchehe na cosa jianha inchin jehe na rinao na, co jamé jehe na nchehe na cosa de joasoaxin de ná na co iná na.

<sup>25</sup> Jehe na vitticaonha na tti ndoa de ixin Dios, sino que jehe na vitticaon na ngain cosa ndoaha, co jehe na nchesayehe na co nchecoanxinhi na tsje cosa que Dios joinchechjian, co nahi Dios mismo tti jiquininxin tsocoanxinhi para cainxin tiempo. Amén.

<sup>26</sup> Mexinxin Dios ndacointtohe cain chojni mé para nchehe na cosa de joasoaxin inchin rinao cuerpoe na, ixin hasta nchí nchehe ncha ngain iná nchí tti jiquininxinha sinchehe ncha, mé jiquininxin nchehe ncha jeha ngain xixihi ncha.

<sup>27</sup> Co ðajeho jamé nchehe xí cai, nchehe xa ngain iná xí cosa de joasoaxin que jiquininxinha;

jeho jiquininxin sinchehe xa ngain čihi xa. Co hasta anto rinao cuerpoe xa sinchehe xa jamé. Xí mé nchehe xa cosa de joasoaxin ngain iná xí, co mexinxin Dios nchecastigá xa ngain cuerpoe xa de ixin tti jianha que jehe xa nchehe xa.

<sup>28</sup> Co ixin chojni mé irinaoha na datsoan na de ixin Dios, mexinxin jehe cointtohe na para řaxaon na cosa jianha, co para que sinchehe na sigue de sinchehe na tti tequininxinha na sinchehe na.

<sup>29</sup> Jehe na anto nchehe na cosa que jiquininxinha; ncheyehe na nčhí co xí, nchehe na tti jianha, anto rinao na cosa de ngataha nontte, co jianha na. Co jehe na anto chjoehe na, dantsjehe na vidé icha chojni, ttjé na chijni, ncheyehe na icha chojni, řaxaon na cosa jianha, co ncheřoxinhi na ttequin na cuentoe icha chojni que jiquininxinha tsequin na.

<sup>30</sup> Jehe na nichja na jianha de ixin icha chojni, ningaconhe na Dios, chondaha na respeto ngain icha chojni, co nichja na jian de ixin jeha na mismo, co orgulloso na. Co jehe na řaxaon na queřén nchehe na icha cosa jianha, co ditticaonha na ndodé na ni janné na.

<sup>31</sup> Jehe na rinaoha na ttinxin na, co ncheyaxon na čhonja tti ndačo na, rinaoha na icha chojni, noeha na nchetjañehe na na, co ttiaconoeha na ni ná chojni.

<sup>32</sup> Cain chojni mé nohe na jian quehe coetonha Dios, co nohe na que cain chojni que nchehe cosa jiji, Dios ndačo que chojni mé tequininxin tsji ngain infierno; pero masqui jamé, jehe na nchehe na sigue de nchehe na cosa jianha co hasta ché na are dicon na iná chojni que jinchehe jamé cai.

## 2

### *Dios nchejuzguehe chojni inchin jiquininxin*

<sup>1</sup> Mexinxin jaha ra nchejuzgueha ra iná chojni, masqui jaha ra chojni judío o quexeho chojni, sino que nchehe ra jehó inchin jiquininxin. Ixin are jaha ra tenchejuzguehe ra iná chojni, jaho ra mismo tedoan ra condenado, ixin jaho ra mismo cai tenchehe ra jehe tti jianha mé.

<sup>2</sup> Ján na noa na que Dios nchejuzguehe chojni inchin tequininxin are jehe ndačo ixin quehe tsonhe cain tti chojni que nchehe cain cosa jianha jiji.

<sup>3</sup> Co jaha ra, ¿o nchejuzguehe ra icha chojni, cottimeja nchehe ra ¿ajeho inchin jehe na, ¿Apoco ¿axaon ra que jaha ra Dios sinttastigaha ra?

<sup>4</sup> ¿Apoco ¿axaon ra que ¿onhi rentte que ixin Dios anto jian nchehe ngain chojni, co chonda anto tsje paciencia ngain na, o atonoaha ra ixin jehe anto jian nganji ra ixin rinao que jaha ra tsentoxinhi vidá ra?

<sup>5</sup> Pero jaha ra anto cha ansean ra co ¿a rinaoaha ra ttentoxinhi ra vidá ra. Mexinxin jaha ra anto tettjejo ra castigo para ixin jaha ra que sayehe ra ngain tti nchanho de castigo are Dios sinchejuzguehe cain chojni inchin tequininxin na.

<sup>6</sup> Are mé jehe tsjenguehe hna cada chojni inchin jehe na joinchehe na.

<sup>7</sup> Dios sanjo iná vida naroaxin ngain tti chojni que cain tiempo nchehe tti jian, ixin ttjé na Dios conixin glorié co ixin rinao na que Dios sinchenchaon na co rrochjé na iná vida naroaxin que ¿onhi tiempo tsjexin.

<sup>8</sup> Pero Dios anto toñao co sinchecastigá cain tti chojni orgulloso, co rinaoha na ditticaon na tti ndoa, sino que ditticaon na ngain cosa jianha.

<sup>9</sup> Anto tangui tsonhe co anto joachjaon tsí ngain cain tti chojni que nchehe cosa jianha; co mé saho tsonhe chojni judío, cottimeja tti chojni que jeha judío.

<sup>10</sup> Pero cain chojni que nchehe tti jian, Dios rrochjé na gloria co sinchenciaon na, co sanjo ngain na tti çhjoin que tsonohe ansén na; co mé saho sayé tti chojni judío, cottimeja cai tti chojni que jeha judío.

<sup>11</sup> Ixin para Dios xonhi chojni icha rentte; cainxin na çajeho na.

<sup>12</sup> Ixin cain chojni que jeha judío co chonxinha na tti ley que vayé Moisés, are jehe na nchehe na cosa jianha, jehe na ndasinchetján na almé na masqui chondaha na ley mé. Co chojni judío que chonxin na ley que vayé Moisés, are nchehe na cosa jianha, Dios sinchejuzguehe chojni mé inchin ndaço ley mé.

<sup>13</sup> Ixin jeha jian ni para ngain Dios si jeha chonxin ni ley mé, sino que jian ni si nchehe ni cain tti ttetonha ley mé.

<sup>14</sup> Pero tti chojni que jeha judío co ni chondaha na ley mé, pero are deporsín nchehe na inchin ttetonha ley mé, jamé rroçho ixin jehe na ochonda na ná ley de jehe na mismo,

<sup>15</sup> ixin jamé jehe na tjago na de ngain tti jehe na nchehe na que ján chonda na ná ley ngain ansén na. Mexinxin chonxin na tti jian, co joarrixaoen na ndache na si jian tenchehe na o ani jianha

tenchehe na.

<sup>16</sup> Jamé tsonhe ngain tti nchanho are Dios sinchejuzguehe tti jimao que xaxaon cainxin chojni. Dios sinchejuzguehe na de ixin Jesucristo inchin ndačoho tti joajna que danjo iná vida naroaxin que janha ndattjan icha chojni.

### *Chojni judío co ley que vayé Moisés*

<sup>17</sup> Pero cada jaha ra ndačoho ra que ixin judío ra, co chonda ra confianza ngain ley que vayé Moisés, co tonoha ra anto orgulloso ixin jaha ra tti chojni Dios.

<sup>18</sup> Cada ra chonxin ra quehe rinao Dios, co ley que vayé Moisés tjagoa ra para ttinchiehe ra tti icha jian.

<sup>19</sup> Co jaha ra tonoha ra orgulloso ixin toena ra ixin nchao nchecoene ra tti chojni chejo, rročoho tti chojni que xonhi chonxin de ixin Dios, co toena ra ixin nchao nchengasene ra tti chojni que espiritue te ngain tti naxin xehe.

<sup>20</sup> Co xaxaon ra que noha ra quexén nchecoene ra tti chojni que xonhi nohe de Palabré Dios, co quexén nchenohe ra cain tti chojni que xa jianha ditticaon ngain Dios, ixin ngain tti ley que vayé Moisés nttiha chonda ra quexén para chonxin ra de ixin Dios co quexén para chonxin ra tti ndoa.

<sup>21</sup> Co jaha ra xo jañá xaxaon ra ixin nchao nchecoene ra icha chojni, ¿quedonda tanguiha ra jaho ra mismo? Si jaha ra mismo ndache ra chojni que jiquininxinha tsé ni cosé iná chojni, ¿quedonda jaha ra ttehe ra?

<sup>22</sup> Si jaha ra mismo ndačoho ra que jiquininxinha sincheyehe ni čihi iná xí, ¿quedonda jaha ra jamé



nchehe ra? Si jaha ra mismo ndoa ningaonhe ra ídolo, ¿quedonda ttehe ra cosa que jí ngaxinhi ningoe?

<sup>23</sup> Jaha ra tonoha ra anto orgulloso ixin chonda ra tti ley que vayé Moisés, pero jaha ra chondaha ra respeto ngain Dios ixin ncheha ra inchin jitaxin ngain ley mé.

<sup>24</sup> Mexinxin jí razón jitaxin ngain Palabré Dios janhi: “Tti chojni que jeha judío nichja na jianha de ixin Dios, pero por ixin tti jaha ra nchehe ra.”

<sup>25</sup> Ján, ndoa que tti xóhe que dinhi circuncisión jian para ixin jaha ra si ditticaon ra tti ley que vayé Moisés. Pero si jaha ra ditticaonha ra ley mé, rrocho que inchin ní chondaha ra xóhe mé.

<sup>26</sup> Co si ná chojni que chondaha xóhe mé, pero si jehe nchehe inchin ttetonha ley, Dios sayé chojni mé inchin si jehe rrochonda xóhe, masqui chondaha xóhe mé.

<sup>27</sup> Tti chojni que chondaha xóhe jihi ngain cuerpoe, pero tti ditticaon ley que vayé Moisés, chojni mé tti sinttajuzgá jaha ra, xo ditticaonha ra ley mé; masqui techonda ra ley nganito xón co techonda ra xóhe ngain cuerpoa ra.

<sup>28</sup> Ixin ná chojni judío čhoha rrondačo ixin jehe ndoa judío jeho ixin ndodé co janné cjoí chojni judío. Co tti xóhe que jehe chonda xonhi rentte si jeho chonda xóhe mé ndojaxin, ngama cuerpoe.

<sup>29</sup> Sino que tti chojni que jehe ndoa judío pero de ngain ansén, co tti xóhe que ndoa rentte, mé tti xóhe de ngain ansén, co jihi ná cosa que ley čhoha sinchehe, sino que jeho Espíritu Santo tti nchao sinchehe. Co tti chojni jamé, Dios mismo sinch-

esayehe chojni mé, co nahi chojni nttihi ngataha nontte tti sinchesayehe.

### 3

<sup>1</sup> Mexinxin ¿queñén icha jian para ná chojni judío? ¿o quehe rentte para ná chojni que chonda tti ñohe que dinhi circuncisión?

<sup>2</sup> Ján, jí anto tsje razón ndoa. Co ná de razón mé ixin Dios joanjo joajné ngain chojni judío.

<sup>3</sup> ¿Pero quehe tsonhe are ñonja de jehe na iditti-caonha na joajna mé? ¿Apoco ixin jehe na jamé na, mexinxin Dios isincheha tti jehe ndaño?

<sup>4</sup> ¡Seguro que Dios sincheha jamé! Sino que Dios nchehe inchin jiquininxin tti ndoa, masqui cainxin chojni ngoixin mundo mentiroso na, ixin ngain tti jitaxin Palabré Dios ndaño:

Chonda que ñago ixin soixin nichja inchin jiquininxin,

co soixin sacha are chojni sinttajuzgaha na.

<sup>5</sup> Cosa roa icha roa are jí ngain cosa chimeco. Co canxion chojni ndaño na ixin jamé cai tti jianha que ján na nttoho na tjago anto jian que ixin Dios nchehe inchin jiquininxin. ¿Quehe rrondaño na remé? ¿Apoco Dios nchehe jianha ixin jehe nttacastigá na? (Jaxon janha rrinichja inchin tti icha chojni.)

<sup>6</sup> ¡Seguro que nahi! Ixin si Dios rrocji jianha ¿queñén jehe nchao sinchejuzguehe chojni ngoixin mundo?

<sup>7</sup> Pero si janha rronichja cosa ndoaha co si cosa mé rrogonda para que rrocjago ixin tti nchehe Dios anto jian; si jamé rrocji, mexinxin ¿quedonda Dios nchejuzgá na que janha ná chojni jianha na?

<sup>8</sup> Si jamé, ¿a icha jian si ján na sonttoho na tti jianha para que jamé tsí tti jian? Jihi tti ndačo canxion chojni que janha na tjagoa ra, pero jehe na jianha žaxaon na, co cain chojni que nichja mé tequinixin na soan na condenado.

*Cain na teca na cosa jianha ngain Dios*

<sup>9</sup> ¿Mexinxin quehe rrondačo na? ¿Aján na žo judío na icha jian na que jehe na que jeha judío na? ¡Seguro que nahi! Ixin janha na ondattjo ra que ixin cosa jianha chonda joachaxin para ixin cain chojni judío co cai para ixin cain icha chojni que jeha judío.

<sup>10</sup> Ngain tti jitaxin Palabré Dios ndačo:  
žonhi chojni jian, pero ni ná chojni;

<sup>11</sup> žonhi chojni rinao ttinxin,  
žonhi ni ná chojni ttjé Dios.

<sup>12</sup> Cainxin chojni ndavitján na de ngain Dios,  
cainxin na tenchehe na joxon tti nchaoa jí.  
žonhi chojni que nchehe tti jian, žonhi pero ni ná na.

<sup>13</sup> Ttosin na inchin ná sepulcro que jižangue;  
conixin neje na ncheyexin na icha chojni.  
Co inchin ná venenoe conché jí ngaxinhi rroha na;

<sup>14</sup> Jehe na jeho nichja na cosa jianha para icha chojni co cosa que chjé joachjaon iná chojni.

<sup>15</sup> Jehe na daca ttji na para digoenxon na chojni;

<sup>16</sup> co de ixin tti jianha que jehe na nchehe na tsje chojni ndaditján co detan tangui,

<sup>17</sup> co jehe na chonxinha na tti čhjoin que tonohé ansén ni.

<sup>18</sup> Co ni žonhi tiempo žaxaon na para žaon na ngain Dios.

<sup>19</sup> Ján na noa na que cain tti ndačo ley que vayé Moisés are osé tiempo, cain mé ndačo para ixin cain chojni que vayé ley mé. Jamé para que xonhi chojni rrondačo ixin jehe jiquininxinha castigoe Dios, co para que cainxin chojni, Dios tti sinchejuzguehe na.

<sup>20</sup> Ixin xonhi chojni nchao tsojian de ixin ley mé, ixin ley jecho donda para nttanoa na que ján na nttoho na cosa jianha.

*Dios tsjenguijna chojni si jehe na chonda na confianza ngain Jesucristo*

<sup>21</sup> Pero jai Dios ojointtanoa na que xén joinchehe jehe para que ján na sontte na chojni jian ngat-toxon con jehe. Co mé jeha de ixin ley, pero tti libro que jitaxin ley jihi, co tti dicjin cain profeté Dios, mé nichja de ixin jihi.

<sup>22</sup> Co mé rročo que ixin Dios nttajian na ngat-toxon con jehe si ján na chonda na confianza ngain Jesucristo. Co jamé para ixin cainxin chojni que chonda confianza ngain Jesucristo, ixin para ixin Dios cainxin chojni xajeho rentte na.

<sup>23</sup> Ixin cainxin chojni joinchehe na jianha co tequininxinha na para sayé na iná vida naroaxin de ngain Dios.

<sup>24</sup> Pero Dios, ixin jehe anto jian ngain cainxin chojni, mexinxin jehe joinchejian na co xonhi nchecobrehe na; rročo ixin chjá na iná vida naroaxin de ixin tti joinchehe Jesucristo.

<sup>25</sup> Dios rroanha Jesucristo para joiguenxin nttihi ngataha nontte co mexinxin de ixin jehe, Dios nchetjañehe chojni tti jianha que jehe na nchehe na. Co cain chojni vitjañehe cain cosa jianha

que nchehe na si jehe na chonda na confianza ngain Jesucristo. Jihi conhe para xagoxin que Dios nchehe inchin jiquinixin, co de ixin tti paciencia que jehe chonda, jehe joincheha caso cain cosa jianha que joinchehe chojni are saho.

<sup>26</sup> Cai conhe cain jihi para xagoxin que Dios jehe nchehe inchin jiquinixin jai cai, rrocho que Dios cain tiempo nchehe inchin jiquinixin ixin jehe ndacho que cain chojni que chonda confianza ngain Jesucristo, ixonhi cosa jianha teca na ngain Dios.

<sup>27</sup> Mexinxin ¿quehe cosa chonda na para sontte na orgulloso? Ixin orgulloe chojni ixonhi rentte. ¿Co quedonda? Ixin si chojni nchao rroguitticaon na ley co jamé rrocojian na ngattoxon con Dios, jamé nchao rroconohe na orgulloso; pero Dios dayá na inchin chojni jian jeho ixin chonda na confianza ngain Jesucristo co mexinxin ján na choha tsonoa na orgulloso.

<sup>28</sup> Mexinxin janha na ocjoagoha ra que Dios ndacho ixin cain chojni que chonda confianza ngain Jesucristo jian na ngattoxon con Dios masqui joinchehe na inchin ttetonha ley o ni nahi.

<sup>29</sup> ¿Apoco Dios jeho Dios de chojni judío? ¿Ajeha cai Dios para chojni que jeha judío? Claro que cai Dios para jehe na.

<sup>30</sup> Ixin xonhi iná Dios, jeho nacoaxinxon. Co jehe tti Dios mé tti nchejian cain chojni que chonda confianza ngain Jesucristo masqui chonda na tti xohe que dinhi circuncisión o ni nahi.

<sup>31</sup> Mexinxin, ¿aħaxaon ra que jhi rroħo que ley que vayé Moisés ħonhi rentte ixin ján na odotticaon na ngain Jesucristo? ¡Seguro que jeha jamé! Sino que ján na ndaħo na que ján ley jhi anto rentte.

## 4

### *Ejemploe Abraham*

<sup>1</sup> Mexinxin ján na, ¿quehe rrondaħo na de ixin quehe joacha Abraham tti cjoí ndogoelitoa na ħanħjen?

<sup>2</sup> Ixin si jehe ndo vanchehe ndo cosa jian, mexinxin rrondaħoxin Dios que Abraham jian ngat toxon con jehe; si jamé rrocji, Abraham jehe nchao rroconohe orgulloso, pero jeha ngat toxon con Dios.

<sup>3</sup> Pero ndaħo ngain tti jitaxin Palabré Dios: “Abraham chonda confianza ngain Dios, co ixin jehe chonda confianza mé, Dios vayé jehe inchin ná chojni que ħonhi jica.”

<sup>4</sup> Nchao jí remé. Jí ná ejemplo: si ná chojni nchehe ná ħa, tti tomí que xinajni danjo, mé jeha ná regalo, sino que tomí mé xinajni ojica xa ngain tti nchehe ħa mé.

<sup>5</sup> Pero si ná chojni masqui ħonhi cosa jian joinchehe, pero si jehe chonda confianza ngain Dios, Dios dayé chojni mé inchin ná chojni jian jeho ixin chojni mé chonda confianza ngain Dios. Jamé Dios dayé chojni que nchehe cosa jianha como si rrocji jian.

<sup>6</sup> Cai mé tti rroħo rey David are ndaħo ixin anto ħjoin para ixin tti chojni que Dios dayé

inclin chojni jian sin que nchehe caso cain cosa jianha que chojni mé joinchehe.

<sup>7</sup> Co David ndačo:

Anto čhjoin para ixin cain tti chojni que Dios nchetjañehe na cain cosa jianha que nchehe na.

<sup>8</sup> Anto čhjoin para ixin tti chojni que Dios ncheha caso cain tti jianha que chojni mé joinchehe.

<sup>9</sup> ¿Aħaxaon ra que tti čhjoin jiji jeho para ixin tti chojni que chonda ħohe que dinhi circunciśón, o ni cai para ixin tti chojni que chondaha ħohe mé? Janha na ondačhjan na que Dios vayé Abraham inclin ná chojni jian que ħonhi cosa jianha veca ixin jehe vechonda confianza ngain Dios.

<sup>10</sup> Pero, ¿aħaxaon ra quesa Dios vayé Abraham? ¿Adespúes de que Abraham vayé ħohe mé, o ani icha saho? Nahi, jeha despúes, sino que icha saho.

<sup>11</sup> Co despúes que Dios vayé Abraham inclin jian, cottimeja Abraham vayé tti ħohe que dinhi circunciśón inclin ná seńal o ná sello que ixin Dios ovayé Abraham inclin ná chojni jian ixin Abraham ovechonda confianza ngain Dios. Jańá conhe para que Abraham joiguehe inclin ndodé cain tti chojni que chonda confianza ngain Dios, masqui vayeha na ħohe mé, pero ixin chonda na confianza ngain Dios, jehe Dios dayé na inclin chojni jian que ħonhi jianha teca na.

<sup>12</sup> Ján seguro que Abraham inclin tti ndodé cain chojni judío que dayé ħohe mé, pero jeho si chojni mé chonda confianza ngain Dios inclin ndodá na Abraham are ħa vayeha ndo ħohe mé.

*Promesé Dios que tonhe are chojni chonda confianza ngain jehe*

<sup>13</sup> Dios ndačo ngain Abraham conixin ngain cain chojni Abraham que sayé na ngoixin nontte inchin herencia. Co Dios chjé na promesa jihi pero jeha ixin Abraham joinchehe cain tti ttetonha ley, sino que ixin jehe chonda confianza ngain Dios, co ixin Dios vayé jehe Abraham inchin ná chojni jian que xonhi jianha veca.

<sup>14</sup> Ixin si jeha tti chojni que nchehe tti ttetonha ley tti dayé herencia, entonce rročo que xonhi rentte tti confianza que chonda chojni ngain Dios, co xonhi rrocorentte promesé Dios.

<sup>15</sup> Ley ndačo ixin Dios tsiaho castigo para chojni que ditticaonha ley me; pero tti chojni que xonhi ley chonda, čoha ni rrondačo ni si ná ni nchehe ni tti ttetonha ley o ni nahi.

<sup>16</sup> Mexinxin, para que promesé Dios ngain Abraham tonhe ngain cain chojni Abraham, mé chonda que vehe inchin ná regalo que dayé cainxin chojni que chonda confianza ngain Dios. Rročo, que promesa mé jeoha para ixin cain tti chojni que nchehe tti ttetonha ley, sino cai para ixin chojni que chonda confianza ngain Dios inchin confianza vechonda Abraham. Mexinxin jehe Abraham cjoí inchin ndodá na cainxin na

<sup>17</sup> xó chonda na confianza ngain Dios inchin confianza vechonda jehe. Inchin ndačo ngain tti jitaxin Palabré Dios: “Janha coín jaha inchin ndodé tsje chojni.” Ixin Dios tti danjo vida ngain tti chojni que ondadenhe, co jehe Dios tti nchechjian cain cosa que veha are saho.



18 Masqui ngain tiempo mé Abraham xonhi esperanza vechonda de rrochonda chjan; pero masqui jamé, jehe vechonda confianza ngain Dios co jamé jehe joiguehe “ndodé tsje chojni”, jamé inchin Dios ndačo ngain jehe Abraham: “Jañá tsotsjexin chojni razá.”

19 Abraham joinchetjanha confianza jiji ngain promesé Dios, masqui jehe ovechonda inchin cien nano co ovenohe que jehe co Sara anto onttaxichjan para que rroquinttechonda chjan.

20 Pero masqui jamé jehe Abraham cointtoeha de vitticaon ni goanha desconfiado de ixin tti ndačo Dios, sino que jehe icha vitticaon co vechonda icha confianza de ixin tti ndačo Dios. Co jehe Abraham joichecoanxinhi Dios,

21 ixin jehe Abraham anto vechonda seguro de que Dios chonda joachaxin para sinchehe cain tti jehe ndačo.

22 Mexinxin Dios vayé jehe Abraham inchin ná chojni jian que xonhi jianha veca ixin Abraham vechonda confianza ngain Dios.

23 Co jehe jiji de que ixin Dios vayé jehe Abraham inchin ná chojni jian que xonhi jianha veca ixin jehe vechonda confianza ngain Dios, mé vetaxinha de ixin jeho Abraham;

24 sino que vetaxin cai de ixin ján na. Ixin ján na cai chonda na confianza ngain Dios tti dayá na ján na cai inchin chojni jian que xonhi jianha teca na, ján na xo dotticaon na ngain Dios tti joinchexechon Jesucristo, tti chonda cain joachaxin para ixin ján na.

25 Jesucristo xanjo para ndavenhe para cjoengahna cain cosa jianha que jointtoho na co cjan

xechon, co jamé para que Dios nchao vayá na inchin chojni jian.

## 5

*Tti tsonhe ni ixin Dios ovayé ni inchin chojni jian*

<sup>1</sup> Jañá ixin Dios ovayá na ján na inchin chojni jian ixin chonda na confianza ngain jehe, mexinxin ján na dontte na amigoe Dios de ixin Jesucristo, tti chonda cain joachaxin para ixin ján na.

<sup>2</sup> Ixin de ixin Jesucristo Dios jointtanchaon na ján na ixin chonda na confianza ngain jehe. Co ixin jehe jointtanchaon na, mexinxin chonda na seguro, chá na co techonhe na ixin Dios rrochjá na parte ngain joachaxín jehe.

<sup>3</sup> Co jeoha chá na de ixin jiji, sino que cai chá na masqui tti anto tangui toan na, ixin noa na que de ngain tti tangui que toan na, nttiha ttixin paciencia que ján na chonda na.

<sup>4</sup> Co are ján na ttixian na ngain cosa tangui conixin paciencia, are mé Dios sayá na inchin chojni jian co mé chjá na esperanza de rrochonda na iná vida naroaxin.

<sup>5</sup> Co ján na xonhi tiempo tsosoá na ixin chonda na esperanza jiji ixin mé cjoago que Dios anto rinao na ján na ixin rroanha Espíritu Santo nganji na.

<sup>6</sup> Ixin are ján na xa čhoha vanttoho na inchin Dios ncheřoxinhi, Cristo venhe para cjoenguijna chojni jianha ngain tiempo que Dios coinchiehe.

<sup>7</sup> xonhi chojni rinao denhe para tsjenguijna iná chojni, ni jehe rinaoha senhe para tsjenguijna ná chojni jian; pero para ixin ná chojni que anto

jian, ján, puede sittoexin iná chojni senhe para tsjenguijna chojni jian mé.

<sup>8</sup> Pero Dios tjagoa na que jehe anto rinao na, ixin jehe rroanha Jesucristo para venxin nttihi ngataha nontte para cjoenguijna na ján na masqui ján na ʒa vanttoho na cosa jianha.

<sup>9</sup> Co jai, ján na ote na chojni jian para ngain Dios ixin Jesucristo ndavenhe para ixin ján na. Mexinxin jai nchao rrochonda na seguro ixin jehe Jesucristo tsanʒjandaha na para ngain tti castigo anto soji que tsí después.

<sup>10</sup> Ixin si Dios mismo cointte na chojni jian para ixin jehe ixin ndavenhe Jesucristo, Xenhe jehe Dios, are ján na ʒa gontte na chojni jianha para ixin jehe, mexinxin jai icha seguro que ján na rrochonda na iná vida naroaxin ixin Cristo jichon co jí nganji na.

<sup>11</sup> Co jeoha jihi, sino que cai chá na ngain Dios de ixin Jesucristo, tti chonda cain joachaxin para ixin ján na, ixin de ixin Jesucristo ján na amigoe na Dios.

### *Adán co Cristo*

<sup>12</sup> Jañá de ixin tti jianha que joinchehe nacoaxinxon xí joí cosa jianha ngataha nontte nttihi, co cai joí tti denhe ni, co mexinxin cainxin chojni denhe na ixin cainxin na joinchehe na cosa jianha.

<sup>13</sup> Icha saho que rroguehe ley que vayé Moisés, cainxin chojni ngoixin mundo ovanchehe na cosa jianha; masqui Dios vancheha caso de ixin cosa jianha que vanchehe chojni are ʒa chondaha na ley mé.

14 Pero masqui jamé, desde ngain tiempoe Adán hasta ngain tiempoe Moisés cain chojni que joinchehe na jianha chonda que ndavenhe na, masqui jehe tti jianha que jehe na joinchehe na jeha inchin tti joinchehe Adán, tti vitticaonha tti coetonha Dios. Co Adán rroanha cain tti jianha que nchehe chojni, pero Jesucristo tti joí después dinttjian cain tti jianha mé.

15 Pero tti jianha que joinchehe Adán čhoha tsoyahi tti jian que Dios chjá na. Ixin de tti cosa jianha que joinchehe nacoa xí, anto tsje chojni ndavintteguenhe na. Pero de tti joinchehe iná xí co mé Jesucristo, de ixin mé Dios chjá na iná vida naroaxin, co řonhi nttacobra na. Co jihi tti joinchehe Dios, mé tti anto icha jian de tti joinchehe Adán, co jehe mé tti ttjenguijna tsje chojni.

16 Tti jianha que joinchehe nacoaxinxon xí čhoha tsoyahi tti vida naroaxin que Dios chjá na; ixin de ngain tti nacoa cosa jianha que joinchehe Adán, Dios joinchecondená cainxin chojni. Pero jai Dios chjé chojni iná vida naroaxin co řonhi nchecobrehe na masqui anto tsje cosa jianha teca na.

17 Ixin si tti ndadenhe ni vechonda joachaxin ngain chojni jeho de ixin tti jianha que joinchehe nacoa xí, mexinxin anto icha seguro que cainxin chojni que Dios ndačo que ixin iřonhi cosa jianha teca na, cain chojni mé rrochonda na joachaxín Dios para isincheha na cosa jianha ngain vidé na naroaxin de ixin tti joinchehe iná xí, co jehe xí mé Jesucristo.

18 De ixin tti jianha que joinchehe Adán, cainxin

chojni ngataha nontte vintte na condenado, jamé cai de ixin tti jian que joinchehe Jesucristo, Dios dayé cainxin chojni que chonda confianza ngain Jesucristo inchin chojni que xonhi cosa jianha teca.

<sup>19</sup> Rrocho que de ixin tti vitticaonha nacoaxinxon xí, que mé Adán, tsje chojni joinchehe na cosa jianha; pero cai de ixin tti vitticaon nacoaxinxon xí, que mé Jesucristo, Dios rrondacho ixin tsje chojni jian na.

<sup>20</sup> Dios vanjo ley ngain Moisés para que chojni anto jian rrochonxin na que tenchehe na cosa jianha; pero masqui chojni joinchehe na tsje cosa jianha; Dios anto icha jian ngain na ixin nchetjañehe na cosa jianha que nchehe na.

<sup>21</sup> Jañá, mexinxin inchin tti cosa jianha que joinchehe chojni joichonda joachaxin para joiaho tti diguenxin ni, jamé cai ixin Dios ndacho que ixonhi cosa jianha teca na ján na, mexinxin tti jian que ttixin de ngain Dios, mé chonda joachaxin para chjá na iná vida naroaxin que xonhi tiempo tsjexin. Co cain tti sayé na jihi, mé por ixin Jesucristo, tti chonda cain joachaxin para ixin ján na.

## 6

*Ján na inttoha na tti jianha, sino que nttoho na inchin ttetonha Jesucristo*

<sup>1</sup> Mexinxin jai ¿quexén sonttoho na? ¿Axa sonttoho na sigue de sonttoho na cosa jianha para que Dios sinchehe sigue sinttatjañá na?

<sup>2</sup> ¡Seguro que nahi! Ján na ocoentoxinhi na vidá na de ngain tti jianha que vanttoho na. Mexinxin

¿queñen ján na sonttoho na sigue de sonttoho na cosa jianha?

<sup>3</sup> ¿Anoaha jaha ra que ixin ján na co Jesucristo te na inchin nacoa chojni ixin joiguite na para sontte na chojni jehe? Co mé rrocho que ixin ján na ndarroguenhe na conixin jehe.

<sup>4</sup> Ixin are ján na joiguite na, mé rrocho que inchin ján na cai xavá na conixin jehe are jehe ndavenhe, para que inchin jehe xechon de ixin tti anto jie joachaxín Ndodá na, que ttjen ngajni, cai ján na xechon na para te na ngain iná vida naroaxin.

<sup>5</sup> Ixin si ján na cjoi na ngain Cristo para ndavenhe na, jañá cai rroxechon na inchin jehe xechon.

<sup>6</sup> Ixin ján na noa na que cainxin tti jianha que vanttoho na are saho, cain mé ondavenxin nganito cruz conixin Jesucristo, para que cuerpo na tehe que rridinchehe cosa jianha ixonhi joachaxin rrochonda para que tsetoan na sonttoho na cosa jianha; co ján na isontteha na de esclavo ngain cosa jianha inchin ngain ná xinajni.

<sup>7</sup> Ixin chojni que ondadenhe na de ngain cosa jianha, jehe na ichoha sinchehe na icha cosa jianha.

<sup>8</sup> Si ján na ondavenhe na conixin Jesucristo, ján na rrochonda na confianza que sonttechon na conixin jehe.

<sup>9</sup> Ixin ján na noa na que ixin Cristo oxechon de ngain tti jehe ndavenhe; ixonhi tiempo jehe rrocjan senhe iná ixin tti ndadenhe ni ixonhi joachaxin chonda para ngain Jesucristo.

<sup>10</sup> Ixin are Cristo ndavenhe, jehe cjoenga hna

cain cosa jianha que nchehe cainxin chojni; jehe ndavenhe nacoa nttiha co mé gonda para cainxin tiempo. Co jehe xechon, co jai jehe jichon para cainxin tiempo para Dios.

<sup>11</sup> Jañá jaha ra cai xaxaon ra que inchin ondavenhe ra de cain cosa jianha que joinchehe ra; pero jai jaha ra dintte ra para ixin Dios inchin nacoa chojni, jaha ra conixin Jesucristo, tti chonda cain joachaxin para ixin ján na.

<sup>12</sup> Mexinxin jai jaha ra dittoaxinha ra que cosa jianha sinchehe sigue de tsetonha ngain cuerpoa ra, tti cuerpo que ndadenhe. Dittoaxinha ra que cosa jianha que rinao cuerpoa ra tsetonha nganji ra.

<sup>13</sup> Co dittoaxinha ra que cuerpoa ra sinchehe cosa jianha. Sino que danjo ra ansean ra para ixin Dios, inchin jiquinixin chojni que ondavenhe co cjan xechon. Dittoaxin ra que Dios tsetonha ngain cuerpoa ra para que sinchehe ra cosa jian.

<sup>14</sup> Ixin cosa jianha ixonhi joachaxin chonda nganji ra, ixin ley que vayé Moisés ittetoanha nganji ra jai, ixin jai tti jian que ttixin de ngain Dios, mé tti ttetonha nganji ra.

### *Ján na inchin ninchehe xa ngain ná xinajni*

<sup>15</sup> ¿Mexinxin, quehe sonttoho na? ¿Asonttoho na cosa jianha ixin ley ittetoanha nganji na, co ixin tti jian que ttixin de ngain Dios tti ttetoan na? ¡Seguro que nahi; sonttoha na cosa jianha!

<sup>16</sup> Jaha ra noha ra jian que si rroxanjo ra inchin ná esclavo ngain ná xinajni para sitticaon ra xa cain tti tsetonha ra xa, jamé jaha ra oná esclavo ra ngain xa co chonda ra que sitticaon ra xa. Jañá,

mexinxin si jaha ra sitticaon ra cosa jianha inchin ná xinajni, pero mé ndasinchetján almá ra. Co si sitticaon ra Dios, jaha ra sintte ra ngain ná vida nao co jian.

<sup>17</sup> Pero janha chjaha gracias ngain Dios ixin masqui jaha ra are saho vintte ra inchin esclavo ngain cosa jianha, pero jai jaha ra conixin ansean ra vitticaon ra Palabré Dios inchin cocoanha ra.

<sup>18</sup> Jai jaha ra iteha ra inchin esclavoe cosa jianha, ixin jai jaha ra ote ra inchin ninchehe xé cosa jian que rinao Dios.

<sup>19</sup> (Janha rrinichja inchin cain chojni jaxon, ixin jaha ra xa čhoha ttinxin ra jian cain cosa jihi.) Inchin are saho jaha ra xanjo ra joinchehe ra cosa ttjoaha co cosa jianha; jamé xanjo ra jai para nchehe ra cosa jian, para sintte ra ngain ná vida nao inchin chojni que tequininxin Dios.

<sup>20</sup> Are jaha ra xa vintte ra inchin esclavo de ngain cosa jianha, are mé jaha ra vintteha ra ngain ná vida nao.

<sup>21</sup> Pero ¿quehe cosa joacha ra are mé de ngain cosa que jai tosoaha ra ixin vanchehe ra mé? xonhi joacha ra ixin cosa mé jeho para nchetján almé ni.

<sup>22</sup> Pero jai cosa jianha mé ixonhi joachaxin chonda para ixin jaha ra ixin jaha ra ojoanjo ra vidá ra para tenchehe ra xé Dios. Co jihi ná cosa jian para ixin jaha ra co de ixin mé jaha ra sinoa ra sinchehe ra jeho cosa inchin Dios rinao. Co después rrochonda ra iná vida que xonhi tiempo tsjexin.

<sup>23</sup> Pero chojni que nchehe cosa jianha, jehe na chonda na que tsji na ngain infierno. Pero Dios



danjo iná vida que xonhi tiempo tsjexin co tti vida mé rrochonda na ján na conixin Jesucristo, tti chonda joachaxin para ixin ján na.

## 7

### *Ejemploe ná nchiganha conixin ján na*

<sup>1</sup> Hermanos, jaha ra xó chonxin ra ley que vayé Moisés onoha ra que ley mé chonda joachaxin ngain chojni, pero jehó are xa jichon chojni mé.

<sup>2</sup> Jihi ná ejemplo: Ná nchí que tottehe xixihi, ley ttetonhe ncha que chonda que sechó ncha xixihi ncha mé are jehe xa xa jichon xa; pero si xixihi ncha ndasenne xa, ley mé ixonhi ttetonhe ncha de ixin jihi.

<sup>3</sup> Rrocho que si jehe ncha dechó ncha iná xí co xixihi ncha xa jichon xa, jehe ncha jianha nchehe ncha ixin jicahó ncha yó xí ngain nacoa tiempo. Pero si xixihi ncha ndavenhe xa, jehe ncha chonda ncha joachaxin de sechó ncha iná xí co jamé jeha cosa jianha sinchehe ncha.

<sup>4</sup> Jañá jaha ra cai, hermanos, xó tequininxin ra Cristo; are saho, ley que vayé Moisés vaquetonha nganji ra inchin ná xí ttetonha xa ngain nchiichihi xa. Pero jai jaha ra cai ondavenhe ra de ngain ley mé, para que jai ojé xí ttetonha ra, co mé Cristo, tti xechon de tti ndavenhe. Co jihi conhe para que vidá na nchao sonda ngattoxon con Dios.

<sup>5</sup> Ixin are saho, are ján na xa vanttoho na cain tti vajinao cuerpoa na, are mé tti ley que vayé Moisés vanttanimá na para vanttoho na icha cosa jianha inchin vajinao cuerpoa na. Co cain cosa jihi jehó donda para nchetján almé ni.

<sup>6</sup> Pero jai ján na ondavenhe na para ngain ley mé, tti ley que anto soji vaquetoan na, co jamé ján na nchao sonttoho na inchin rinao Dios de ngain vidá na naroaxin que chjá na Espíritu Santo, co inttoha na inchin vanttoho na are tti ley icha saho vaquetonha nganji na.

*Tti jianha que jí nganji na janha*

<sup>7</sup> Mexinxin, ¿quehe rrondaçho na? ¿Apoco rrondaçho na ixin ley que vayé Moisés, mé jianha? ¡Seguro que nahi! Pero janha rrochonxinha quex-ehe cosa jianha si rroqueha ley mé. Jí ná ejemplo: Janha rrocononaha tti jianha de rinaho cosé iná chojni si ley rrondaçhoaha que ixin mé jianha.

<sup>8</sup> Si rrococoha ley jihi, janha antoha rrojinaho rrojinttaha cosa jianha, pero ixin ley joí, joar-rixaonna icha xaxaon de jointtaha cosa jianha. Ixin tti coha ley, cai nttiha chojni chonxinha quex-ehe cosa jianha.

<sup>9</sup> Vehe ná tiempo are janha xa venonaha quehe ttetonha ley jihí, are mé janha vaaxanho que xonhi cosa jianha rrica. Pero después, are janha oconona quehe ttetonha ley jihí, are mé janha joatsoan que rrica tsje cosa jianha, que hasta jiquininxin na tsji ngain infierno ixin anto tsje cosa jianha jointtaha.

<sup>10</sup> Jañá rroçho que ley mé tti rroganjo ná vida que xonhi tiempo tsjexin ngain tti chojni que rro-guitticaon ley mé, pero para ixin janha, ley mé jeho cjoago que jiquininxin na tsji ngain infierno ixin çhoaha jointtaha cain tti ttetonha ley mé.

<sup>11</sup> Ixin tti jianha que cuerpona rinao, mé joincheyana, cottimeja joinchegonda ley para

ndačo que ixin janha jiquininxin tsji ngain infierno.

<sup>12</sup> Mexinxin jehe ley mé que vayé Moisés, seguro jian ley, co cain tti ttetonha ley jian, co inchin jiquininxin, co nchao jí.

<sup>13</sup> Pero ¿apoco rročo que cain cosa jian jihi, tti ndačo ixin janha jiquininxin tsji para ngain infierno? ¡Seguro que nahi! Tti cain cosa jianha que janha jointtaha, mé tti ndačo ixin janha jiquininxin tsji para ngain infierno ixin ley jihi cjoago que tti janha jointtaha jianha jí. Co jañá ley jihi cjoago ixin tti jianha que nchehe ni anto nchaoha jí.

<sup>14</sup> Ján na noa na que ley jian ixin joixin de ngain Espíritu Santo, pero janha inchin ná esclavo que dicochji na ngain cosa jianha.

<sup>15</sup> Ixin janha ttianxinha quehe tonna, ixin janha rinaho sinttaha inchin jiquininxin, pero čoha. Sino que tti jianha que janha rinaoha sinttaha, mé tti janha nttaha.

<sup>16</sup> Jañá si tti janha rinaoha sinttaha, mé tti janha nttaha, jamé janha datsoan que jehe ley que vayé Moisés jian ley mé.

<sup>17</sup> Mexinxin jañá rročo que jeha janha tti ntaha cosa jianha yá, sino que tti jianha que jí ngaxinhi cuerpona, mé tti nchehe cosa jianha yá.

<sup>18</sup> Ixin janha nona que tti jí nganji janha, rročo ngain cuerpona, mé jeha jian. Ndoa janha rinaho sinttaha cosa jian, pero čoha.

<sup>19</sup> Janha čoha nttaha cosa jian inchin janha rinaho, sino que janha nttaha sigue de nttaha cosa jianha que janha rinaoha.

<sup>20</sup> Mexinxin si janha nttaha tti janha rinaoha sinttaha, rrocho que jeha janha tti rrinttaha, sino tti jianha que jí ngaxinhi cuerpona, mé tti jinchehe yá.

<sup>21</sup> Jañá mexinxin janhi tti tonna: are janha rinaho sinttaha cosa jian, choha ixin jeho nchao nttaha cosa jianha.

<sup>22</sup> Ngaxinhi ansenna janha anto rinaho sinttaha inchin ttetonha ley de Dios.

<sup>23</sup> Pero cuerpona rinaoha nchehe inchin rinao ansenna. Cosa jianha que jí ngaxinhi cuerpona, mé tti ttetonha ngain cuerpona co mé rrocho que inchin jiaxinna ngain cosa jianha.

<sup>24</sup> ¡Anto feo tonona janha! ¿Quensen nchao tsonxindanguehe joachaxin jianha que jí ngain cuerpona jihi para que janha tsjiha ngain infierno?

<sup>25</sup> Jeho Dios tti nchao tsjenguijna na janha de ixin Jesucristo, tti chonda cain joachaxin para ixin ján na. ¡Chjaha gracias ngain Dios para ixin jihi! Mexinxin jai janha ttianxin que janha chonda que sitticanho ley de Dios pero si janha rroguitticaonha ngain Jesucristo, cain cosa jianha xa rroguinte ngain cuerpona co janha rrogarihi inchin esclavo de ngain cosa jianha mé.

## 8

*Espíritu Santo de Dios tti ttjenguijna na para nttoho na inchin jiquininxin*

<sup>1</sup> Pero jai Dios xonhi castigo sanjo ngain cain tti chojni que te inchin nacoa chojni conixin Jesucristo; tti chojni que incheha na inchin rinao cuerpoe na, sino que nchehe na inchin rinao Espiritu Santo.

<sup>2</sup> Ixin tti ttetonha Espiritu Santo, mé tti nttaha janha jai. Co Espiritu mé tti chjana janha vida naroaxin ixin janha ditticanho Jesucristo, co jamé cosa jianha ichondaha joachaxin nganji janha, co itsjiha ngain infierno.

<sup>3</sup> Ixin Dios nchao joinchehe tti choha joinchehe ley que vayé Moisés, ixin ley mé coixinha joacha ngain cosa jianha que jí ngain cuerpoe ni. Pero Dios ján, coixinhi joacha ngain cosa jianha ixin jehe rroanha Xenhe, co joigayé Xan ná cuerpo inchin cuerpo que ján na chonda na para ndavenhe Xan para que cjoenga Xan hna cain cosa jianha que jointtoho na. Rrocho que jamé Dios rroanha Xenhe para joantsjehe tti joachaxin que vechonda cosa jianha ngain cuerpoa na.

<sup>4</sup> Cain jiji joinchehe Dios para que ján na nchao sonttoho na cain tti ttetonha ley, ixin jai ján na inttoha na inchin rinao cuerpoa na, sino inchin rinao Espiritu Santo.

<sup>5</sup> Ixin cain tti chojni que nchehe inchin rinao cuerpoe, chojni mé jehó xaxaon na cain cosa que rinao cuerpoe na. Pero cain tti chojni que nchehe inchin rinao Espiritu Santo, chojni mé xaxaon na de ixin cosa que Espiritu Santo rinao.

<sup>6</sup> Co si rroxaxaon ni jehó cain cosa que rinao cuerpoe ni, jehe ni seguro tsji ni ngain infierno are ndasenhe ni. Pero si rroxaxaon ni cosa que Espiritu Santo rinao, jehe ni rrochonda ni vida

ngain Dios que xonhi tiempo tsjexin, co tsonohe ni čhjoin ngain ansén ni.

<sup>7</sup> Cain tti chojni que xaxaon jeho tti rinao cuerpoe, chojni mé ningaconhe na Dios, ixin ni rinaoha na ni čhoaha na para que jehe na sitticaon na ngain ley de Dios.

<sup>8</sup> Mexinxin cain tti chojni que anto rinao nchehe jeho inchin rinao cuerpoe, chojni mé čhoaha sinchehe inchin nchexoxinhi Dios.

<sup>9</sup> Pero jaha ra itencheha ra inchin rinao cuerpoa ra, sino que jai jaha ra tenchehe ra inchin rinao Espíritu Santo, si ndoa Espíritu Santo de Dios jí nganji ra. Ixin tti chojni que chondaha ngain ansén tti Espíritu Santo que Cristo rroanha, chojni mé jeha chojni Cristo.

<sup>10</sup> Pero si Cristo jí ngain ansean ra masqui cuerpoa ra chonda que ndasenhe ixin joinchehe ra cosa jianha, masqui jamé tsonhe cuerpoa ra, pero espiritua ra sinchehe sigue sechon ixin Dios ondačo que jaha ra ixonhi cosa jianha teca ra.

<sup>11</sup> Espíritu Santo de Dios joinchexechon Jesucristo, co cai si jí Espíritu Santo nganji ra, jehe Dios sinchexechon cuerpoa ra co rrochonda cuerpo iná vida naroaxin de ixin Espíritu Santo mé.

<sup>12</sup> Jańá hermanos, mexinxin jí ná cosa que ján na chonda que sonttoho na, pero jeha de sonttoho na tti rinao cuerpoa na.

<sup>13</sup> Ixin si jaha ra tenchehe ra cain tti rinao cuerpoa ra, jaha ra chonda ra que tsji ra ngain infierno, pero si sinchehe ra inchin rinao Espíritu Santo, jamé jaha ra sinchexantte ra tti jianha que rinao cuerpoa ra, co jamé jaha ra rrochonda ra tti vida naroaxin.

14 Cainxin chojni que nchehe inchin rinao Espíritu Santo de Dios, cainxin chojni mé xenhe Dios.

15 Co Espíritu Santo que jaha ra vayehe ra, mé jeha ná espíritu que joindattjo ra que jaha ra sintte ra inchin ninchehe xa que anto chonda joaxaon ngain xinajní na. ¡Nahi, jeha jamé! Sino que Dios rroanha Espíritu mé nganji ra para que jaha ra nchao sintte ra xenhe Dios. Co jehe Espíritu jihi tti nttacoán na nichja na: “¡Dios, Ndodá na!”

16 Co jehe mismo Espíritu Santo jihi tti ttí ngain espiritua na para dindačo nganji na que ján na seguro oxenhe Dios na.

17 Co ixin ján na xenhe Dios na, ján na chonda na derecho de sayé na cain tti jian que Dios ndačo rrochjá na ixin ján na conixin Jesucristo sayé na cain tti jian mé. Ixin si jai tonoa na tangui inchin Cristo conohe, después ján na tsoyá na conixin jehe.

18 Nchao remé, janha xaxanho que tti tangui jihi xonhi quehe para ngain tti chjoin que socon na después.

19 Cainxin tti joinchechjian Dios techonhe co anto rinao tsí tti nchanho que Dios rrondačo quecá chojni tti xenhe Dios.

20 Ixin cain cosa que joinchechjian Dios goan condenado, pero jeha ixin cosa mé jamé rinao, sino que ixin Dios tti joinchecondená cain yá ixin chojni joinchehe na jianha. Pero mé jeho tsonchjenhe hasta que

21 cainxin cosa que jí, sehe naroaxin co xonhi tiempo rroxantte ni irrorrengaha, sino que sintte na chjoin inchin xenhe Dios co ixonhi tsonhe cain

cosa mé.

<sup>22</sup> Ján na noa na que hasta ngain tiempo jiji cainxin tti joinchechjian Dios tangui jitonhe co deha inchin ná nchí que jittín ixin sincheconcjihichjan.

<sup>23</sup> Co jeoha cainxin cosa mé tti tangui jitonhe, sino que cai ján na mismo, masqui ján na ochonda na Espíritu Santo ngain ansean na, que mé saho de cain tti rrochjá na Dios. Ján na anto tá na joachjaon co techonhe na tti nchanho are ján na sontte na inchin mero xenhe Dios, ixin are mé Dios tsentoxinhi cuerpoa na que chonda na jai para rrochonda na iná cuerpo que xonhi tiempo ndasenhe.

<sup>24</sup> Ixin ján na dotticaon na ngain Jesucristo, mexinxin chondaxin na iná vida naroaxin; co ixin dotticaon na, rrocho ixin ján na techonhe na ná cosa que xa chondaha na. Ixin si ján na orrochonda na cosa mé, ichondaha na que rrochonhe na jehe mé.

<sup>25</sup> Pero si tti ján na techonhe na, mé ná cosa que ján na xa choha dayé na, ján na chonda na que rrochonhe na conixin paciencia.

<sup>26</sup> Co cai jamé Espíritu Santo jittjenguijna na are ján na techonda na ná problema. Ixin ján na noaha na nttotsenhe na ñao Dios inchin jiquininxin, pero Espíritu Santo, jehe mismo tti nchetsenhe ñao Dios para ixin ján na, co jehe nichja de iná manera que ján na chonxinha na.

<sup>27</sup> Co Dios, tti chonxin ansén cain chojni, nohe quehe rinao Espíritu Santo ixin jehe Espíritu Santo nchetsenhe ñao Dios para que Dios sinchehe ngain chojní inchin jehe Dios rinao.

*Ján na osacha na cain tti jian de ixin Jesucristo*



<sup>28</sup> Ján na noa na que cainxin tti tonhe chojni que rinao Dios, cain cosa mé Dios rroanha ngain na para ttjenguijnaxin na, ixin cain chojni mé tti Dios coinchiehe, co mé tonhe na inchin rinao Dios.

<sup>29</sup> Ixin desde are coexinhi vehe mundo, Dios onohé quecá chojni sitticaon na ngain jehe, co desde are maho jehe ondačo que cain chojni mé sintte na inchin xenhe jehe para que Jesu-cristo Xenhe Dios, mé tti Xansaho de ngayehe tsje xanchó Xan.

<sup>30</sup> Co cain tti chojni que desde are saho Dios ondačo que sintte na inchin xenhe jehe, cai jehe nichjé cain chojni mé para tsí ngain jehe, co cai jehe sayé cain chojni mé inchin chojni jian para ixin jehe, co cai jehe Dios vanjo tsje cosa jian ngain cain chojni mé.

<sup>31</sup> ¿Mexinxin, jai quehe rrondačo na remé? Si Dios jañá ttjenguijna na, ¿quensen nchao tsja cha nganji na?

<sup>32</sup> Xonhi cosa jí que Dios rinaoha chjá na, ixin hasta rroanha Xenhe para joiguenhe Xan para cjoenguijna na Xan ján na cainxin na. Mexinxin si jehe jamé rroanha Xenhe nganji na, seguro que jehe rrochjá na cain tti jian que jehe chonda.

<sup>33</sup> ¿Quensen nchao rročo jie de ixin tti chojni que Dios coinchiehe? Ixin Dios tti ondačo que jehe na iXonhi cosa jianha teca na.

<sup>34</sup> Mexinxin ¿quensen nchao sinchecondená cain chojni mé? Ixin Cristo tti ndavenhe para ixin jehe na, co icha de mé, Cristo tti oxechon co jai jehe jí ngain lado jian de Dios, co jinchetsenhe ñao Dios para ixin ján na.

<sup>35</sup> Mexinxin, ¿quensen nchao rrocayacoen Cristo

para que isinaoha na? ðonhi cosa sinchehe mé, ixin masqui tsonia na o tsonoa na tangui, o masqui icha chojni feo sinchehe na nganji na, o masqui senhe na jinta o rrochondaha na lontto, o masqui rrochonda na peligro, o masqui hasta ndasenhe na; masqui cain problema mé rrochonda na, pero Cristo cainxin tiempo sinao na.

<sup>36</sup> Inchin ndaho ngain tti jitaxin Palabr  Dios: De ixin caus  soixin janha na cain nchanho chonda na peligro de ndasenhe na; icha chojni nchehe na nganji na inchin nchehe na ngain coleco que sadiguenhe.

<sup>37</sup> Pero masqui cain jihi toan na, j n na sach na ngain cain cosa jihi, de ixin Jesucristo, tti anto rinao na.

<sup>38</sup> Ja n  mexinxin janha rrichonda seguro que ðonhi cosa rrocayacoen Dios para que isinaoha na. Ni masqui ndasenhe na, o ni sonttechon na, ni masqui tti sinchehe  ngel de Dios, ni tti sinchehe esp ritu jianha, ni masqui cain tti tetoan na jai, ni cain tti tsoan na despu s,

<sup>39</sup> ni masqui tti sinchehe cain cosa que j  noi, ni tti sinchehe cain cosa que j  anto nihnga, ni masqui tti sinchehe in  cosa que Dios joinchechjian, pero ni n  de cainxin cosa y  chonda joachaxin para que rrocayacoen Dios para que Dios isinaoha na, ixin jehe cjoagoa na que anto riano na ixin rro n na Jesucristo, tti chonda cain joachaxin para ixin j n na.

## 9

*Dios tti coinchiehe chojni Israel*

<sup>1</sup> Janha rrindačhjan tti mero ndoa inchin jiquininxin chojni que ditticaon ngain Jesucristo, co xonhi cosa ndoaha rrindačhjan. Ixin Espiritu Santo jittetonhe ansenna, co jinchenona que ján seguro tti janha rrindačhjan.

<sup>2</sup> Co janha anto rrichinhi co ngain ansenna cainxin tiempo anto feo tonona, ixin chojni Israel ditticaonha na joajna ndoa.

<sup>3</sup> Mexinxin janha mismo rojinaho que Dios rrojinchecondená na co rrogačhjenda de Cristo, si cain jihi rrocji jian para ixin chojnina, tti chojni que joixin de ngain xajeho razana.

<sup>4</sup> Cain chojni jihi razé Israel, co are icha saho Dios vayé nindogoelitoe jehe na inchin xenhe jehe. Dios vehe ngayehe jehe na co vicon na tti chíxo que jehe chonda are cononxin ngain na, co Dios joinchechjian trato ngain na, joanjo ngain na tti ley que vayé Moisés, cjoagoe na que xén vanchecoanxinhi na jehe ngain nihngo, co chjé na promesa.

<sup>5</sup> Co cain chojni Israel de tiempo jihi joixin na de ngain razé nigoelitoa na xančhjen. Co de ngain nimé cai joixin Cristo, co Cristo, jehe Dios de cainxin cosa, co jamé jiquininxin tocoanxinhi para cainxin tiempo. Amén.

<sup>6</sup> Pero mé rročhoha que ixin promesé Dios conha ngain chojni Israel; pero rročo que cainxinha chojni que joixin de ngain razé Israel cjoí tti ndoa chojní Israel.

<sup>7</sup> Cai cainxinha chojni que joixin de ngain razé ndo Abraham cjoí ndoa chojní ndo, ixin Dios ondačo ngain tti jitaxin Palabré: “De ixin xanha Isaac rrochonda xanttia.”

<sup>8</sup> Mexinxin noa na que ni xonhi chojni cjoixenhe Dios jeho ixin joixin de ngain ná raza especial. Sino que jeho chojni que ditticaon ngain promesé Dios, mé tti xenhe Dios.

<sup>9</sup> Ixin janhi promesé Dios para ixin Abraham: “Ngain tiempo que janha coínchiá, janha sihi co nñhíchiha Sara rrochonda nñha ná chjan.”

<sup>10</sup> Co cai jí icha. Cayoi xenhe Rebeca chonda xan nacoa ndodé xan, que mé ndogelitoa na Isaac.

<sup>11-13</sup> Pero icha saho que chjan mé concjihi xan, rrocho are xa xonhi joinchehe xan, ni cosa jian joincheha xan, ni cosa jianha joincheha xan, pero are mé Dios ndache Rebeca: “Esaú, tti sehe xansaho, sinchehe xé Jacob, tti xanyoxin.” Co mexinxin cai Dios ndacho ngain tti jitaxin Palabré: “Janha rinaho Jacob pero rinaoha Esaú.” Mexinxin jihi cjoago ixin Dios chonda joachaxin de ttinchiehe quexeho chojni que jehe rinao, masqui nchehe na jian o jianha.

<sup>14</sup> Mexinxin ¿quehe rrondacho na? ¿Apoco rrondacho na ixin Dios ncheha inchin jiquinxin? ¡Segruo que nahi!

<sup>15</sup> Ixin Dios ndacho ngain Moisés: “Janha tsiaconoá chojni tti janha rinaho ttiaconoá, co sinchenina tti chojni que janha rinaho tsiaconoá.”

<sup>16</sup> Mexinxin rrocho que Dios tsiaconoeha chojni ixin jehe na jamé rinao na o ixin jehe na joinchehe na tsje cosa jian, sino que Dios tsiaconoeha chojni jeho ixin jehe jamé rinao.

<sup>17</sup> Ixin ngain tti jitaxin Palabré Dios, nttiha Dios ndacho janhi ngain rey de Egipto: “Janha chjaha jaha joachaxin de rey jeho para cjoago

tti joachaxin que janha chonda co para chojni ngoixin nontte rrochonxin nombrena.”

<sup>18</sup> Mexinxin rročo ixin Dios tsiacoehe tti chojni que jehe Dios rinao ttiacoehe co jehe sinchecha ansén tti chojni que jehe Dios rinao nchecha ansén na.

<sup>19</sup> Pero puede ná ra rroundachjenji ni ra: “Si jamé, ¿quedonda Dios ndačo ixin chojni teca jianha ngain jehe? Ixin ¿quensen nchao sinchehe cosa oje que Dios rinao?”

<sup>20</sup> Pero, ¿quensen jaha para sinchediscutí ngain Dios? ¿Apoco ná chi nchao ndačo ngain jehe tti joinchegjian chi mé: “¿Quedonda jaha jaña joinchegjian na?”

<sup>21</sup> Ixin jehe tti nchegjian chi chonda joachaxin de nchegjian quexeho cosa jehe rinao. Jehe nchao nchegonda xajeho tipo de jinche para nchegjian ná chi anto chjoin co iná chi corriente.

<sup>22</sup> ¿Co queén jaha ndačo ixin nchaoha si Dios rinao sinchegonda chojni que tsji ngain infierno, co jehe coixinhi ngain na conixin anto paciencia masqui vequininxin na castigo, si jehe joinchegonda chojni mé para cjoago joachaxin que jehe chonda co ixin jehe nchecastigá chojni jianha?

<sup>23</sup> Ixin jehe Dios jamé joinchehe para que ján na rrochonxin na ixin jehe jiquininxin tsosayehe co ján na jehe coiaconoá na co jointtanoa na icha saho ixin rrochonda na ttoha joachaxin conixin Jesucristo.

<sup>24</sup> Ixin Dios ndattjo na ján na ixin sihi na ngain jehe, ján na xó judío na conixin jaha ra xó jeha judío ra.

<sup>25</sup> Jamé inchin ndačo ngain Palabré Dios ngain libroe Oseas:

Chojni que jeha chojnina, jehe na sinttaguinhi na chojnina,

co chojni que rinaoha, chojni mé tti janha sinaho.

<sup>26</sup> Co ngain xajeho lugar tti janha ndačhjan: “Jaha ra jeha chojnina”,

nttiha chojni mé sinhi na xenhe Dios que jichon.

<sup>27</sup> Co profeta Isaías ndačo janhi de ixin chojni Israel: “Masqui chojni de ngain razé Israel tsotsje na hasta inchin xochjenhe nchise ngandehe ndanchaon, masqui jamé sintte na, pero jeho nchion na rrochonda na iná vida naroaxin de ngain Dios,

<sup>28</sup> ixin Dios, tti chonda cain joachaxin, anto daca sinchecastigá cainxin chojni ngataha nontte.

<sup>29</sup> Co inchin Isaías ndačo icha saho ngain Palabré Dios:

Si Dios, que chonda cainxin joachaxin nttiha ngaini, si jehe rroquiaconoaha na ján na ján na rrocoha na jai, inchin chojni ngain ciudad de Sodoma co ciudad de Gomorra.

*Chojni judío vitticaonha na tti jian joajna*

<sup>30</sup> Mexinxin ¿quehe rrondačhjan na? Rrindačhjan na que ixin chojni que jeha judío cjoeha na quežén sintte na jian ngattoxon con Dios. Pero masqui jamé, Dios vayé na inchin chojni jian ixin chonda na confianza ngain Jesucristo.

<sup>31</sup> Pero chojni Israel rinao ditticaon nchehe ná ley co jamé rroquintte na jian ngattoxon con Dios, pero jehe nimé čhoha joinchehe na cain tti ttonha ley mé.

<sup>32</sup> ¿Quedonda ĉoha vintte na jian? Ixin jehe na joinao na rroguintte na jian ngattoxon con Dios jeha de ixin tti vanchehe na, co nahi de ixin tti confianza ngain Dios. Mexinxin jehe na vetsinga na inchin ngataha “tti ĵo que tonttenguixin chojni”,

<sup>33</sup> tti ĵo que Palabr  Dios ndaĉho janhi:

Janha ts n ngain ciudad de S n inchin n  ĵo que tonttenguixin chojni, co jehe na ĵantjxin na;

co cain chojni que ditticaon ngain jehe tti ĵo m , ĵonhi tiempo sinttech n na de ixin ĵo m .

Ixin ĵo m  Jesucristo.

## 10

<sup>1</sup> Hermanos, tti janha anto rinaho ngain ansenna co tti janha anto nttats n  nno Dios, m  que ixin cainxin chojni Israel rrochonda na in  vida naroaxin.

<sup>2</sup> Anto nchao para ixin jehe na ixin anto rinao na sinchecoanxinhi na Dios, pero chonxinha na ntti  Dios.

<sup>3</sup> Ixin jehe na chonxinha na que  n Dios nchejian chojni ngattoxon con jehe, sino que jeha na cjo  na que  n sinchehe na para tsojian na ngattoxon con Dios, co jam  ditticaonha na tti joinchehe Dios para ixin jehe na.

<sup>4</sup> Ixin are Cristo jo , jehe joinchehe cain tti ttonha ley que vay  Mois s. Co jai de ixin tti jehe joinchehe, cain chojni que chonda confianza ngain jehe tsojian na ngattoxon con Dios.

<sup>5</sup> Mois s dicjin janhi de ixin que  n chojni tsojian na ngattoxon con Dios de ixin ley que jehe

vayé: “Chojni que nchehe cain tti ndačo ley sintechon na para cainxin tiempo.”

<sup>6</sup> Pero ján na tsojianxin na ngattoxon con Dios de ixin tti confianza que chonda na ixin ngain Palabré Dios ndačo janhi: “Ndačoha ra ngain ansean ra: ¿Quensen saccoajín para ngajni? —rročo para sinchexincanji ra Jesucristo—;

<sup>7</sup> ni ndačoha ra: ¿Quensen rroxincanji ngain tti te nindadiguenhe?” —rročo para sinchecajín ra Cristo de ngayehe nindadiguenhe.

<sup>8</sup> Cain mé ndačoha ra ixin jitaxin ngain Palabré Dios janhi: “Palabré Dios jí anto chiaon nganji ra, ixin ojí Palabra mé ngá rroha ra co ngaxinhi ansean ra.” Co Palabra jihi tti joajna que janha na ndačhjan na.

<sup>9</sup> Si jaha rrondačo conixin rroha que ixin Jesucristo, mé tti chonda joachaxin nganji jaha, co si jaha ditticaon ngain ansean ixin Dios joinchexechon jehe, si jamé nchehe, jaha rrochonda iná vida naroaxin.

<sup>10</sup> Rročo de ixin tti dotticaon na ngain ansean na, ján na nchao tsoroa na ngattoxon con Dios. Co de ixin rroha na nichjxin na jian de ixin Jesucristo para jamé rrochonda na iná vida naroaxin.

<sup>11</sup> Ngain Palabré Dios ndačo: “Ni ná chojni que ditticaon ngain Jesucristo sechín de ixin jehe.”

<sup>12</sup> Jeha importante para ixin Dios si chojni judío o ni nahi, ixin Dios chonda joachaxin para ixin cain chojni, co anto nchenciaon cain chojni que nchecoanxinhi jehe.

<sup>13</sup> Ixin janhi ndačo ngain tti jitaxin Palabré Dios: “Cainxin chojni que nchecoanxinhi Dios, tti



chonda cain joachaxin, cain chojni mé rrochonda na iná vida naroaxin.”

<sup>14</sup> Pero ¿queñén chojni nchao sinchecoanxinhi na Dios si ãa ditticaonha na ngain? ¿Co queñén nchao sitticaon na ngain Dios si ãa ãonhi coinhi na de ixin jehe? ¿Co queñén tsinhi na si ãonhi chojni cjoí joindache na joajna de ixin jehe?

<sup>15</sup> ¿Co queñén chojni tsji sindache icha chojni joajna mé si ãonhi quensen rroanha na? Inchin jitaxin ngain Palabré Dios: “¡Anto çhjoin are ttí chojni que dicao joajna que ncheconohe çhjoin ansén chojni, co mé tti jian joajné Jesucristo!”

<sup>16</sup> Pero cainxinha chojni nchehe caso ngain joajna mé que danjo iná vida naroaxin. Jamé inchin ndaço profeta Isaías: “¿Quensen vitticaon joajna que joiquian na?”

<sup>17</sup> Mexinxin chojni nchao sitticaon na o ani nahi ngain Jesucristo, pero jeha hasta tsinja na joajné jehe.

<sup>18</sup> Pero janha danchiangui: ¿Andoa ixin chojni Israel coinha joajné Jesucristo? ¡Nahi, ndoaha; seguro que jehe na coinhi na! Ixin ngain Palabré Dios ndaço janhi:

Chojni de ngoixin mundo coinhi na tté chojni que vanichja Palabré Dios,  
co hasta chojni ngain lugar icha cjin de ngain nontte jiji cai coinhi na palabré jehe na.

<sup>19</sup> Pero janha cjan danchiangui iná: ¿Apoco chojni Israel coinxinha na joajna mé? Saho Dios nichjaxin tté Moisés para ndaço ngain tti jitaxin Palabré Dios:

Janha sinttanchaon ná nación que jeha nación ndoa para que tsochjio chojnina,

co janha sinttanchaon chojni que xonhi chonxin para que tsoñao chojnina.

<sup>20</sup> Cottimeja Dios nichjaxin tté profeta Isaías para ndačo:

Chojni que cjoeha na na janha, pero nimé ni vittja nã;

co janha xago na ngain chojni que joanchianguiha de ixin janha.

<sup>21</sup> Co Dios nichja iná ixin tté Isaías; nichja de ixin chojni Israel are ndačo: “Ngoixin nchanho janha rrinichjá chojni que ditticaonha nganji na co tti ningaonna janha.”

## 11

### *Chojni Israel que chonda iná vida naroaxin*

<sup>1</sup> Mexinxin jaxon janha danchiangui: ¿Apoco Dios vengui cain chojni jehe, tti chojni Israel co ixonhi tiempo rrocjan sayé na iná? ¡Seguro que nahi! Ixin janha mismo ná chojni Israel. Janha joixin de razé Abraham co de ngain grupoe Benjamín.

<sup>2</sup> Desde are saho Dios ndačo ixin chojni Israel, chojni jehe. Co jehe senguiha cain na jai. ¿Achonxinha ra tti ndačo Palabré Dios ngain historié profeta Elías tti joinchecoanxinhi co cjoanguihi chojni Israel ngain Dios? Jehe Elías are mé ndačo:

<sup>3</sup> “Chojni Israel nagoenxon na cain profetá co joinchexantte na cain altár soixin. Co jecho janha xehe na, co jehe na rinao na nasoenxon na na cai.”

<sup>4</sup> Pero Dios ndačo: “Janha coenchjinha yáto mil xí que joinchesayeha xa ídolo Baal.”

<sup>5</sup> Co tonhe xajeho jai cai. Dios coinchiehe nchion chojni Israel para joinchetjañehe na. Jamé joinchehe Dios ixin jehe anto jian.

<sup>6</sup> Dios nchetjañehe chojni ixin jehe Dios jian. Si Dios jeho rrojinchetjañehe tti chojni que nchehe jian, mé rrocho que ján na ivitjañaha na de ixin tti jian que Dios chonda.

<sup>7</sup> Mexinxin jiji tti conhe: Chojni Israel vittjaha na tti cjoé na. Jeho tti chojni que Dios coinchiehe, mé nivittja tti jian que Dios chonda. Cain icha chojni cosoji ansén na.

<sup>8</sup> Inchin ndacho ngain Palabré Dios: “Dios joinchecha ansén na; jehe chjé na jmacon na que čoha dicon co ndatsjoen na que čoha ttinhi. Co jamé tetonhe na hasta jai.”

<sup>9</sup> Cai David ndacho:  
Que vandangoe na rrocjamanguia inchin trampa  
co inchin nonchaha  
para que jeho mé rrotse chojni co soan na casti-  
gado.

<sup>10</sup> Co que jmacon na isiconha jmacon co tsochejo na, co que lomoe na rrožadoho para cainxin tiempo.

*Chojni que jeha judío nchao rrochonda na iná vida naroaxin*

<sup>11</sup> Jai janha danchiangui: ¿Apoco chojni judío are vetsinga na ixonhi tiempo singattjen na iná? ¡Seguro que nahi! Sino que ixin chojni judío vitticaonha na, mexinxin chojni que jeha judío chonda na oportunidad de rrochonda na iná vida naroaxin. Jamé para tsochjio chojni Israel hasta que jehe na cai sino na vida mé.

12 Mexinxin tti nchaoha que joinchehe chojni judío cjoí jian para icha chojni ngataha nontte. Co ixin chojni judío concjin de ngain Dios, icha chojni nchao tsonchienne ngain Dios. Mexinxin, si jihi tti conhe ixin chojni judío iditticaonha ngain Dios, ¿seguro anto icha jian tsonhe cain chojni are chojni judío rrocjan sitticaon ngain Dios iná!

13 Pero janha chonda tti rrondattjo ra ¿o jeha judío ra. Ixin Dios chjana ¿a de representanté Jesucristo ngain chojni que jeha judío, mexinxin janha ndačhjan ixin ¿a jihi, anto importante ¿a.

14 Rinaho que de ixin ¿a jihi canxion chojni que cai judío na tsochjio na de ixin jaha ra, co sinao na rrochonda na iná vida naroaxin cai.

15 Ixin si chojni ngoixin mundo tsonohe čhjoin ngattoxon con Dios ixin jai jehe vengui chojni judío mexinxin ¿quehe tsonhe are Dios sayé na iná? Mé inchin vida naroaxin para tti nindadiguenhe.

16 Ixin si tti saho niottja que tonchjian de ngain nchoho, si niottja mé jiquininxin ngain Dios, rročo ixin ngoixin nchoho mé jiquininxin ngain Dios. Co si noehe ná nttá jiquininxin ngain Dios, rročo ixin cain ramé nttá mé jiquininxin ngain Dios cai.

17 Ná chojni nchao tončhinji ramé ná nttaolivo fino co ngain lugar mé nchetsexin ramé ná ntaolivo cimarrón. Jamé conhe chojni judío; Dios cončhinji canxion chojni judío co saquehe chojni que jeha judío ngain lugué na. Co mexinxin jai jaha ra ¿o jeha judío ra chonda ra ¿ajeho parte ngain Dios inchin vechonda chojni Israel. Jamé inchin ramé ná nttaolivo cimarrón que ndatsexin

nttaolivo fino, rama mé chonda parte ngain noehe co ngain vidé nnttaolivo fino.

18 Pero ꞡaxaonha ra ixin jaha ra icha jian ra que rama que vehe icha saho, rroĉho chojni judío. Co si ꞡaxaon ra ixin icha jian ra, ꞡaxaon ra ixin jaha ra vanjoha ra vidá ra ngain noehe nntta, sino que noehe nntta tti chjá ra vida.

19 Puede rrondaĉho ra: “Ján ndoa pero tti rama icha saho ĉhinji rama para janha tsexin na nnttiha.”

20 Ndoa, pero jehe na ĉhinji na ixin vitticaonha na ngain Jesucristo, co jaha ra chonda ra lugar nnttiha jeho ixin ditticaon ra ngain Jesucristo. Mexinxin tonoaha ra orgulloso, sino que ttjiho ra cuidado.

21 Ixin si Dios joinchetjañeha chojni judío, tti cjoí inchin rama icha saho, cai jaha ra sinttatjañaha ra si chondaha ra confianza ngain Jesucristo.

22 Tsjexinxin ra, Dios anto jian, pero cai jehe toñao ngain chojni que ndaditján ngain tti jianha. Pero jehe anto jian nganji jaha ra. Pero jaha ra chonda que sinchehe ra sigue dayehe ra jian cain tti jian que danjo Dios. Si nahi, jaha ra cai tsonĉhinji ra inchin ramé nntá icha saho.

23 Co cai si chojni judío ꞡa rrocjan sitticaon iná, Dios sinchetsexin ngain nntá iná, ixin Dios chonda joachaxin mé.

24 Ixin si jaha ra que jeha chojni judío, pero Dios conĉhinji jaha ra de ngain ná nnttaolivo cimarrón co joinchetsexin ngain nnttaolivo fino; si Dios nchao nchehe jamé, ¡seguro que jehe nchao sinchetsexin rama saho ngain nntá iná; rroĉho ixin nchao sayé chojni judío iná!

*Are chojni Israel rrochonda na vida naroaxin*

<sup>25</sup> Hermanos, janha rinaho que jaha ra rrochonxin ra cosa jima que Dios sinchehe. Rinaho que jaha ra datsoan ra jihi para xaxaonha ra ixin anto noha ra. Co jihi tti xaxaon Dios: Masqui tsje chojni Israel ditticaonha ngain Jesucristo jai, pero mé jeho tsonchjenhe hasta que ositticaon cainxin chojni que jeha judío que sinao sitticaon ngain Jesucristo.

<sup>26</sup> Are tsonhe jihi, cottimeja cainxin chojni Israel sayé na iná vida naroaxin, ixin ngain tti jitaxin Palabré Dios ndačo:

Jehe tti danjo iná vida naroaxin tsixin de ngain Sión

co jehe sinttjian cain tti jianha de ngain razé Jacob.

<sup>27</sup> Co janha sinttachjian trato jihi conixin jehe na are sinttjian cain tti jianha que chonda na.

<sup>28</sup> Ixin chojni judío ditticaonha tti jian joajné Jesucristo, mexinxin Dios ningaconhe na. Jamé para rrochjá jaha ra ná oportunidad para sitticaon ra ngain Jesucristo. Pero Dios xa rinao chojni judío ixin coinchiehe nindogelitoe na xanchjen.

<sup>29</sup> Co tti Dios danjo, jehe xonhi tiempo dinttjian iná co xonhi tiempo ndačo ixin chojni jehe ijeha chojni.

<sup>30</sup> Icha saho jaha ra vaguitticaonha ra Dios, pero jai Dios coiaconoaha ra ixin chojni judío incheha na inchin ttetonha jehe.

<sup>31</sup> Co jai jehe na iditticaonha na, pero mé jeho para que Dios tsiaconoehe na, jamé inchin jai coiaconoaha ra jaha ra.

<sup>32</sup> Ixin Dios chjé joachaxin cainxin chojni de sincheha na inchin jehe ttetonha para que jehe nchao tsiacoehe yahi cain na.

<sup>33</sup> ¡Anto tsje cosa rentte chonda Dios! ¡Co anto nohe co anto ttinxin jehe! Ꞥonhi chojni nchao ndaꞤo quedonda jehe nchehe tti jehe nchehe, ni Ꞥonhi chojni nchao ttinxin nttié jehe.

<sup>34</sup> Ixin jitaxin ngain Palabré Dios: “¿Quensen ttinxin tti Ꞥaxaon Dios, tti chonda cain joachaxin? ¿O quensen joinchecoeha Dios?”

<sup>35</sup> ¿Co quensen nchao rrochjé Dios ná cosa saho, para que después nchao sachá Ꞥhonja cosa?”

<sup>36</sup> Ixin cainxin cosa joixin de ngain Dios co cainxin cosa conchjian de ixin jehe co para ixin jehe. ¡Dios tsosayehe para cainxin tiempo! Amén.

## 12

### *Quexén nchehe chojni que tequininxin ngain Dios*

<sup>1</sup> Mexinxin hermanos, ixin Dios anto ttiacoehe cain chojni, janha nttatsanha ñao ra ixin Ꞥanjo ra jaha ra mismo ngain Dios, inchin ná ofrenda que jichon, que jiquininxin ngain Dios, co ncheꞤoxinhi jehe. Jihi rroꞤo ixin jaha ra ndoa nchecoanxinhi ra Dios, co jihi tti jiquininxin sinchehe ra.

<sup>2</sup> Ncheha ra inchin ndaꞤo chojni que diticaonha ngain Jesucristo; sino ttentoxinhi ra joarrixaoan ra para que jamé sintte ra chojni naroaxin. Co jamé rrochonxin ra tti rinao Dios, rroꞤo cosa jian, cosa que ncheꞤoxinhi Dios co tti jian que jiquininxin sinchehe ra.

<sup>3</sup> Ixin Dios anto jian, jehe chjana xa de representanté Jesucristo. Co mexinxin janha rronhattjo ra cain ra, que xaxaonha ra ixin jaha ra anto jian ra. Pero cada ra chonda ra que xaxaon ra jian que xén tenchehe ra jai que Dios ojointtanchaon ra de ixin tti confianza que chonda ra ngain Jesucristo.

<sup>4</sup> Ixin inchin cuerpoe chojni chonda tsje parte, co cainha parte mé nchehe xajeho xa,

<sup>5</sup> jamé cai ján na masqui tsje na, pero ján na inchin nacoa cuerpo. Co ján na te na ngain Jesucristo inchin cain parte de cuerpoe ná chojni.

<sup>6</sup> Dios ochjá na ojejú joachaxin. Co chjá na cada na tti clase de joachaxin que jehe rinao rrochonda na. Co ján na chonda na que nntogonda na jian tti clase de joachaxin que Dios chjá na. Rrocho, si Dios chjá na joachaxin de ndache na chojni joajna que dayé na de ngain Dios, ján na chonda na que sotticaon na jian ixin Dios ndoa chjá na joajna, co rronddache na chojni joajna que dayé na.

<sup>7</sup> O si Dios chjá na joachaxin de tsjenguijna na icha chojni, ján na chonda na que tsjenguijna na na jian. Co jehe tti chonda joachaxin para sinchecoehne chojni, chonda que sinchecoehne na conixin ngoi ansén.

<sup>8</sup> Co jehe tti chonda joachaxin de sincheanimá chojni, chonda que sincheanimá na conixin jian ansén. Co jehe tti tsjenguijna icha chojni conixin tomi ixin Dios jamé rinao, jehe chonda que sanjo tomi conixin jian ansén. Co jehe tti chonda joachaxin para tsetonhe icha chojni, chonda que sicao cuidado de sinchehe jamé pero jian. Co jehe tti chonda joachaxin de tsiaconoehne chojni noa,



chonda que tsonohe čhjoin are sinchehe jamé.

*Tti chonda que sinchehe chojni que ditticaon ngain Jesucristo*

<sup>9</sup> Rinao chó ra conixin ansean ra roa. Ninga-conhe ra cain tti jianha co nchehe ra tti jian.

<sup>10</sup> Chonda ra que rinao chó ra inchin rinao ra xanchó ra; ttjenguijna chó ra co ncherespetá chó ra.

<sup>11</sup> Nchehe ra xá ra conixin ansean ra, co xonhi tiempo tosaha ra. Co nchehe ra xé Jesucristo conixin ngoixin ansean ra.

<sup>12</sup> Cainxin tiempo contento dintte ra ixin jaha ra chonda ra seguro ixin chonda ra iná vida naroaxin. Co chonda ra paciencia are tangui tsonha ra. Co xonhi tiempo ttinttohe ra de nchecoanxinhi ra Dios.

<sup>13</sup> Ttjenguijna ra icha chojni que ditticaon ngain Jesucristo are jehe na dondehe na čhonja cosa. Co jian dayehe ra tti chojni que siji sitsjaha ra.

<sup>14</sup> Nchetsenhe ra ñao Dios ixin jehe sinchenciaon chojni que nchehe feo nganji ra. Nchetsenhe ra ñao Dios ixin jehe sinchenciaon chojni mé, co danchiaha ra cosa jianha para ixin jehe na.

<sup>15</sup> Contento dintte ra ngain chojni que te contento; co tsjanga ra conixin chojni que tetsjanga.

<sup>16</sup> Rinao chó ra čhjoin. Dintteha ra orgulloso, sino que dintte ra inchin chojni que jeha importante. Co xaxaonha ra ixin anto noha ra.

<sup>17</sup> Si ná chojni sinchehe feo nganji ra, jaha ra ncheha ra feo ngain chojni mé. Tsjehe ra quexén sinchehe ra para que sinchehe ra tti jian ngat-toxon con cain chojni.

<sup>18</sup> Nchehe ra cainxin tti jaha ra nchao nchehe ra para sino ra ċhjoin cainxin chojni.

<sup>19</sup> Hermanos que janha anto rinaho, xonhi tiempo nchehe ra feo ngain chojni que joinchehe feo nganji ra, sino que dittoaxin ra que Dios sinchecastigá chojni mé, ixin ngain tti jitaxin Palabré Dios ndaċho: “Janha tti jiquininxin na sintta-castigá chojni; janha tti tsjengá hna, ndaċho Dios, tti chonda cain joachaxin.”

<sup>20</sup> Cai ndaċho ngain Palabré Dios: “Si ná chojni que jaha ningaconha jidenhe jintta, chjehe jehe tti sine; co si jidenhe jinda, chjehe jehe tti sihi, ixin si jaha jamé sinchehe, jehe anto tsosoé.”

<sup>21</sup> Dittoaxinha ra que sinttatján ra cosa jianha. Sino que nchetján ra tti jianha de ixin tti jian.

## 13

<sup>1</sup> Cain chojni chonda que sitticaon na ngain nitetonha ngain gobierno. Ixin xonhi chojni chonda joachaxin para ttetonha si Dios chjeha joachaxin mé. Co cainxin nittetonha mé vayé na joachaxín na de ngain Dios.

<sup>2</sup> Mexinxin chojni que ttetocaho gobierno, chojni mé ttetocaho tti Dios joinchechjian. Co cain chojni que nchehe jamé sintteca tti jianha co soan castigado.

<sup>3</sup> Ixin cainxin chojni que ttetonha ngain gobierno teha para sinchexaon chojni que nchehe jian, sino que para sinchexaon chojni que nchehe tti jianha. Mexinxin ċarinao tasarihi co rroxaonha ngain nittetonha? Nchehe tti jian co chojni que ttetonha anto sino na jaha.

<sup>4</sup> Ixin nittetonha, mé ninchehe xé Dios que nchehe xa para ttjenguijna jaha. Pero si jaha sinchehe tti jianha, rrochonda que rrořagoen nittetonha mé ixin jehe na ndoa chonda na joachaxin para sinchecastigá na chojni. Nittetonha mé ninchehe xé Dios para sinchecastigá chojni que nchehe jianha.

<sup>5</sup> Mexinxin jaha ra chonda ra que ditticaon ra ngain nittetonha nganji ra, co jeoha para sayeha ra castigo, sino que cai para que tsonoha ra de ngain ansean ra que chonda que sitticaon ra.

<sup>6</sup> Co cai de ixin cain jihi jaha ra chonda ra que tsjenga ra hna impuesto ixin nittetonha mé nchehe na xé Dios co jehe na cainxin tiempo nchehe na xa jihi.

<sup>7</sup> Chjehe ra cada chojni tti jiquininxin. Ngain chojni que jaha ra teca ra contribución, ttjenga ra hna contribución mé. Co ngain chojni que jaha ra teca ra impuesto, ttjenga ra hna impuesto mé. Co ngain chojni que jiquininxin respeto, chjehe ra respeto. Co ngain chojni que jiquininxin sinc-headmirá ra, ntheadmirá ra chojni mé.

<sup>8</sup> Dinttecaha ra ngain ni ná chojni. Jaha ra jehochonda ra que rinao chó ra. Ixin chojni que rinao icha chojni, mé tti jinchehe cain tti ttetonha ley de Dios.

<sup>9</sup> Mandamientoe Dios ndařho: “Chondaha ra nřhicoxe o xicoxe, co dantsjeha ra vidé iná chojni, ni tteha ra cosé iná chojni ni nichjaha ra cosa ndoaha de iná chojni, ni dinaoha ra rrochonda ra cosé iná chojni”; pero mandamiento jihi co cain icha mandamiento jí ngain jehopalabra que ndařho janhi: “Dinao ra icha chojni inchin rinao

ra cuerpoa ra.”

<sup>10</sup> Chojni que rinao icha chojni sincheha feo ngain na, co jamé de ixin tti rinao chó na, ditticaon na nchehe na ngoixin ley que ttetonha Dios.

<sup>11</sup> De ixin cain palabra jihi, xaxaon ra ngain quexehe tiempo techon na jai, co onoha ra ixin ojoí tiempo para que ján na rroxingamá na de ngain cottachin. Jamé ixin jai anto icha ochiaon jitonchienne tiempo para rrochonda na iná vida naraoxin que are coexinhi na gotticaon na joajné Jesucristo.

<sup>12</sup> Tti naxin xehe omerocoa ndajoexin, co jitonchienne nchanho. Mexinxin chonda na que isonttoha na cosa que nchehe ni ngain naxin xehe, rrocho cosa jianha, co sonttengá na lonto de chia para sontte na inchin soldado que chji ngain joadingasán.

<sup>13</sup> Rrocho que sonttoho na tti jian, inchin jiquininxin nchehe ni ngain nchanho. Co sontteha na dicoan na, ni sacjiha na ngain vandango tti anto ruido jí, ni rrochondaha na nchicoxe ni xicoxe, ni rrochondaha na vicio, ni tsetocoha chó na, ni rrochondeha chó na joachjoehe.

<sup>14</sup> Pero ján na jian sayé na joajné Jesucristo, que mé tsjenguijna na inchin lonto chia ttjenguijna xisoldado. Co rroxaxaonha na de sonttoho na inchin rinao cuerpoa na.

## 14

*Nichjaha feo de ixin tti nchehe iná chojni que ditticaon ngain Jesucristo*

<sup>1</sup> Si ná chojni xa jianha ditticaon ngain Jesucristo, pero dayehe ra chojni mé inchin hermanoa

ra co nchediscutiha ra ngain chojni mé cosa que seguroha de ixin tti dotticaon na.

<sup>2</sup>Jí ná ejemplo: Te chojni que xaxaon ixin nchao jine na cain cosa, co te chojni que xa jianha ditti-caon ngain Jesucristo, co chojni mé jineha nntao.

<sup>3</sup>Tti chojni que jine cain cosa čhoaha sinchehe meno jehe tti jineha cainxin cosa; co tti chojni que jineha cainxin cosa chondaha que rronichja feo de ixin jehe tti jine cain cosa, ixin Dios ovayé jehe chojni mé.

<sup>4</sup>¿Co quensen jaha ra para rronichja ra feo de ixin ninchehe xé iná chojni? Ixin si chojni mé sittohe jian o sittoeha jian, pero mé cosé ninajní jehe. Co seguro ixin jehe sittohe jian ixin Dios, tti chonda cain joachaxin, tsjenguijna jehe para sittohe jian.

<sup>5</sup>Co jí iná ejemplo: Te chojni que chjé icha importancia ngain ná nchanho que ngain iná nchaon, co te icha chojni que xaxaon cain nchanho xajeho nchaon. Naná chojni chonda que tsinchiehe tti jehe sitticaon, co sitticaon jian ngain mé.

<sup>6</sup>Chojni que xaxaon ixin te nchanho que icha importante que icha nchaon, chojni mé jamé xaxaon para nchesayehe Jesucristo. Co tti chojni que xaxaon ixin cain nchanho xajeho, cai chojni mé jamé xaxaon para nchesayehe Jesucristo. Co chojni que jine cain cosa, jamé jine na para nchesayehe na Jesucristo, ixin chojni mé danjo na gracias ngain Dios para ixin tti jine na. Co chojni que jineha cain cosa, cai jamé nchehe na para nchesayehe na Jesucristo, co jehe na cai danjo na gracias ngain Dios.

<sup>7</sup> Ixin ni ná de ján na techon na para ixin jaon na mismo, co are ndadenhe na, jeha para ixin jaon na mismo.

<sup>8</sup> Ixin are techon na, mé para ixin Jesucristo, co are ndasenhe na, mé para ixin Jesucristo cai. Mexinxin are techon na co después de ndasenhe na, ján na chojní Cristo na.

<sup>9</sup> Ixin Cristo ndavenhe co después jeha xechon iná, para rrochonda cain joachaxin para ixin tti nindadenhe co cai para tti ni xa techon.

<sup>10</sup> Pero jaha ra, ¿quedonda nchejuzgá ra ngain icha chojni que ditticaon Jesucristo? ¿O quedonda nchehe ra meno jeha na? Ixin cain ján na rrochonda na que tsonchienne na ngattoxon con Cristo para que jeha sinttajuzgá na.

<sup>11</sup> Ixin ndačo ngain Palabré Dios:  
Inchin anto seguro que janha rrichon, cai anto seguro que cainxin chojni settoxin nttajochjihi na ngattoxon con na janha, ndačo Dios, tti chonda cain joachaxin,  
co cainxin chojni rrondačo na ngattoxon con icha chojni ixin janha Dios na.

<sup>12</sup> Mexinxin naná na chonda na que rrondache na Dios cainxin tti nttoho na ntthi ngataha nontte.

### *Nchetjanjiha ra icha chojni que ditticaon ngain Jesucristo*

<sup>13</sup> Mexinxin ján na chondaha na que rronichja na feo de ixin tti nchehe icha chojni que ditticaon ngain Jesucristo. Co en lugar de mé tsjehe ra queén sinchehe ra para que sinchetjanjiha ra chojni mé, rročo que xonhi nchehe ra para sinchencheha ra na cosa jianha.

<sup>14</sup> Janha nona que ni ná cosa que jine chojni ttjoaha, co janha chonda seguro de jihi ixin ditti-canho Jesucristo, tti chonda cain joachaxin. Pero si čhonja chojni řaxaon ixin ná cosa ttjoaha para jine ni, mexinxin para ixin jehe, cosa mé ttjoaha.

<sup>15</sup> Co si de ixin tti jintte jaha, iná chojni que ditticaon Jesucristo tonohé feo, mé rročo ixin are jintte cosa mé jaha irinaoha chojni mé. Dittoaxinha que ndasitján ná chojni que Jesucristo ndavenhe para cjoenguijna, jehó ixin jaha rinao jintte čhonja cosa que chojni mé ndačo ixin ttjoaha.

<sup>16</sup> Chjeha ra icha chojni oportunidad de rronichja na jianha de ixin cosa que jaha ra ndačo ra ixin jian.

<sup>17</sup> Ixin ngain tti ttetonha Dios jeha importante tti jine ni co tti dihi ni, sino que tti importante, mé ná vida jian, co tti čhjoin que tsonohe anséan ra co ixin contento sintte ra. Cain mé tti danjo Espiritu Santo.

<sup>18</sup> Jehe tti nchehe řé Cristo inchin cain jihi, chojni mé nchehe tti ncheřoxinhi Dios co icha chojni rronichja jian de ixin jehe chojni mé cai.

<sup>19</sup> Mexinxin ján na sonttoho na sigue tsjé na tsje cosa que tsonohe čhjoin ngain ansean na ixin conixin cain mé ján na nchao tsjenguijna chó na para icha jian sotticaon na.

<sup>20</sup> řonhi cosa nchehe que sinchetján tti joinchehe Dios ngain vidé iná chojni de ixin tti jintte. Seguro ixin chojni nchao jine quexeho cosa, pero jianha para jine ni ná cosa que sinchetjanji iná chojni para sinchehe cosa jianha.

<sup>21</sup> Anto jian si chojni sineha nttao, ni diha vino, ni řonhi iná cosa nchehe que sincheyehe

iná chojni que ditticaon ngain Jesucristo, o que sinchenchehe jehe cosa jianha, o que sinchesojiha de ngain confianza que jehe chonda.

<sup>22</sup> Tti jaha ditticaon de ixin cain cosa jiji ndache jeho Dios. ¡Anto čhjoin para ixin tti chojni que tonoeha feo are jehe nchehe ná cosa que jehe ndačo ixin jian!

<sup>23</sup> Pero tti chojni que jine ná cosa co chondaha seguro que mé jian, Dios sinchecondená chojni mé, ixin jehe mé chondaha seguro si Dios ndačo ixin jian cosa mé para sine. Ixin jianha nttoho na are nttoho na ná cosa co chondaha na seguro si Dios chjá na joachaxin para nttoho na jamé.

## 15

*Nchehe tti ncheřoxinhi icha chojni co jeoha tti nttaxoxinhi jaha*

<sup>1</sup> Ján na řo dotticaon na jian ngain Jesucristo čhoha sonttoho na jeho inchin jaon na rinao na, sino que chonda que tsjenguijna na tti chojni que řa jianha ditticaon ngain Jesucristo para que jehe na icha tsosoji na de ngain confianza para ngain Jesucristo.

<sup>2</sup> Naná ján na chonda na que sonttoho na tti ncheřoxinhi icha chojni para tsjenguijna na jehe na para que sinttotsje na confianzé na para ngain Jesucristo.

<sup>3</sup> Ixin Cristo cai joincheha inchin jeho joincheřoxinhi; sino que conhe inchin ndačo ngain Palabré Dios: “Tti cosa feo que chojni ndačo de ixin soixin, vetsingataha na janha.”



<sup>4</sup> Ixin cain cosa que vetaxin icha saho ngain Palabré Dios, cain cosa mé chojní Dios dicjin na para tsjagoa na na de ixin Dios, para que ján na rrochonxin na jian que ixin Dios danjo ngain chojni iná vida naroaxin, co de ixin jihi rrochonda na paciencia co consuelo que danjo tti Palabré Dios.

<sup>5</sup> Que Dios, tti danjo paciencia co consuelo, tsjenguijna ra para sintte ra çhjoin ngain icha chojni, inchin ndaço Jesucristo.

<sup>6</sup> Jamé para que cain ra junto, xá nacoa tté chojni tsinhi ni, sinchecoanxinhi ra Dios, Nododé Jesucristo, tti chonda cain joachaxin.

*Tti jian joajné Jesucristo cai para ixin chojni que jeha judío*

<sup>7</sup> Mexinxin dayehe chó ra inchin Cristo vayá na ján na; jamé nchehe ra para nchesayehe ra Dios.

<sup>8</sup> Ixin janha ndattjo ra que ixin Cristo joí ngataha nontte para tsjenguijna chojni judío co jañá joinchehe ngain na para joiconhe tti joinche-prometé Dios are saho ngain nindogoelitoa na, co jamé cjoago ixin Dios ndoa nchehe tti ncheprometé.

<sup>9</sup> Cai jehe joí ngataha nontte para que chojni que jeha judío sinchecoanxinhi Dios ixin jehe anto ttiaconoehe chojni, inchin ndaço ngain Palabré Dios:

Mexinxin janha sinttacoanxinha soixin ngayé chojni que jeha judío  
co janha rrotsje na himno para sinttasayaha soixin.

<sup>10</sup> Co ngain iná parte de Palabré Dios ndaço:

Chaha ra x̄o jeha judío ra conixin jaha ra x̄o chojní Dios.

**11** Co ngain iná parte de Palabré Dios ndačho:

Nchecoanxinhi ra Dios, tti chonda cain joachaxin, cainxin ra x̄o jeha judío ra

co cain ra nichja ra de ixin tti joachaxin que jehe chonda.

**12** Co Isaías dicjin:

Tsoncjihí ná tti tsixin razé Isaí

que mé Dios tsín para tsetonhe cain chojni que jeha judío;

co jehe nimé tsí na ngain jehe para rrochonda na iná vida naroaxin.

**13** Que Dios, tti chjá na confianza de rrochonda na iná vida naroaxin, tsjenguijna ra para anto rrochaha ra co anto čhjoin tsonohe ansean ra ixin ditticaon ra ngain jehe, para que de ixin joachaxín Espíritu Santo jaha ra anto tsje confianza rrochonda ra de rrochonhe ra tti iná vida naroaxin que tsí.

**14** Hermanos, janha chonda seguro ixin jaha ra anto jian ra ngain icha chojni co anto jian chonxin ra, co ixin anto noha ra quexén chjehe chó ra jian consejo.

**15** Pero ngain carta jihí janha x̄aonha na para cjinha ra anto claro de ixin cain cosa jihí para que x̄onhi rrotjañaha ra. Janha jamé jointtaha ixin Dios, tti anto jian, chjana x̄a

**16** de nttaha x̄é Jesucristo ngayé chojni que jeha judío. Janha ndačhjan na tti joajné Dios que danjo iná vida naroaxin ngain cainxin chojni para que janha nchao sanjo tti chojni mé ngain Dios, co jehe

Dios sinao sayé na ixin Espíritu Santo osincherona.

<sup>17</sup> Ixin janha ditticanho Jesucristo, mexinxin janha tonona čhjoin de ixin xa que nttaha para ixin Dios,

<sup>18</sup> ixin janha nichja jeho tti Jesucristo joinchehe de ixin janha para que jai chojni que jeha judío ditticaon na ngain Dios co nchehe na inchin ndačo jehe. Co jiji joiconhe conixin palabra que jehe joinchenichja na co de ixin tti jehe joinchehe conixin janha,

<sup>19</sup> co de ixin señas co milagros co joachaxín Espíritu Santo. Co jamé janha joexin ndattjan chojni tti jian joajné Jesucristo desde ciudad de Jerusalén co cainxin lugar hasta regioen Ilírico.

<sup>20</sup> Mexinxin janha cainxin tiempo joinaho nichja tti jian joajna mé ngain lugar tti chojni xa coinha de ixin Cristo, para que janha xonhi tiempo sinttaha sigue sinttaha xa que iná chojni nchequexinhi.

<sup>21</sup> Sino que icha jian tonhe inchin ndačo ngain Palabré Dios:

Chojni que xonhi tiempo coinhi joajné jehe, mé sicon na jehe,  
co chojni que xonhi tiempo coinhi de ixin jehe,  
nimé ni tsinxin de ixin jehe.

*Pablo xaxaon tsji Roma*

<sup>22</sup> Co ixin janha varichonda tsje xa, mexinxin čhoha joasotsjaha ra, masqui tsje nttiha janha joinao rrogasotsjaha ra.

<sup>23</sup> Pero jai janha ojoexin xana ngain región jiji, co ixin chonda tsje nano que janha rinaho sasotsjaha ra,

<sup>24</sup> jai xaxanho ixin satto nttiha para sasotsjaha ra are satsji España. Co después de osasotsjaha ra, xaxanho que puede jaha ra tsjenguijna ni ra para sinttaviajá tti tsji.

<sup>25</sup> Pero jai janha tsji Jerusalén para tsinha tomi ngain chojni que ditticaon Jesucristo nttiha.

<sup>26</sup> Ixin chojni ngain nihngo ngain Macedonia co Acaya xaxaon na joatsetaonhe chó na tomi para rroanha na ngain chojni Jesucristo que anto noa ngain Jerusalén.

<sup>27</sup> Jehe na joinchehe na jamé ixin xaxaon na ixin mé jian, co ndoa jihi jian, ixin ndoa cai que chojni ngain Macedonia co Acaya teca na ngain tti ni ngain Jerusalén. Ixin de ixin chojni judío, tti chojni que jeha judío nchao rrochonda iná vida naroaxin. Mexinxin chojni que jeha judío co ditticaon ngain Jesucristo co chonda iná vida naroaxin chonda que tsjenguijna conixin tomí na tti chojni judío que ditticaon ngain Jesucristo.

<sup>28</sup> Mexinxin are janha tsjexin xana co sanjo tomi mé ngain chojni de Jerusalén, cottimeja satsji España co are mé satto sasotsjaha ra cai.

<sup>29</sup> Janha chonda seguro que are janha tsji nganji ra, Dios anto sinchenciaon tti jian joajné Jesucristo que janha rrondattjo ra.

<sup>30</sup> Hermanos, janha nttatsanha ñao ra por ixin Jesucristo, tti chonda cain joachaxin para ixin ján na, co de ixin Espíritu Santo, tti ttjenguijna na para rinao chó na, nttatsanha ñao ra de ixin mé que sinchetsenhe ra ñao Dios para ixin janha.

<sup>31</sup> Nchetsenhe ra ñao Dios que tsjenguijna na para que xonhi tsonna de ngain chojni que dit-

ticaonha Jesucristo ngain Judea, co ixin chojni que ditticaon Jesús ngain Jerusalén jian sayena na janha conixin tomi que tsjinha.

<sup>32</sup> Jamé para que si Dios rinao janha saso sasotsjaha ra co anto rrochahna co nchao sinttajogaha are sasotsjaha ra jaha ra.

<sup>33</sup> Que Dios, tti danjo tti chjoin que tonohé ansén ni, sehe nganji ra. Amén.

## 16

### *Joajna que cjoihí cada chojni*

<sup>1</sup> Janha rrinttatsanha ñao ra que dayehe ra jian hermana Febe, nchí que joinchehe xé Dios ngain nihngo que jí ngain rajna Cencrea.

<sup>2</sup> Dayehe ra nchí jihí jian de ngain nombré Jesucristo, inchin jiquinixin nchehe cain chojni que ditticaon ngain Jesucristo, co ttjenguijna ra ncha de ngain quexeho cosa que sondehe ncha, ixin jehe ncha cjoenguijna ncha tsje chojni que ditticaon ngain Jesucristo, co cai cjoenguijna na ncha janha mismo.

<sup>3</sup> Chjehe ra joajna cai ngain nchí que dinhi Priscila co xixihí que dinhi Aquila, tti compañerona ngain xé Jesucristo.

<sup>4</sup> Cayoi chojni jihí coín na vidé na en peligro para cjoenguijna na na janha para venha na. Mexinxin janha chjaha cayoi na gracias, co jeoha janha rrichjaha na gracias, sino que cai cain chojni que jeha judío pero ditticaon ngain Jesucristo.

<sup>5</sup> Chjehe ra joajna cai cain tti chojni que ditticaon ngain Jesucristo, ni xatte ngain nchiandoha Priscila co Aquila. Chjehe ra joajna xiamigona

Epeneto que janha anto rinaho, ixin xí jihi tti saho vitticaon ngain Jesucristo de cainxin chojni ngain regioen Acaya.

<sup>6</sup> Chjehe ra joajna María, tti anto joinchehe x̄a ngayaha jaha ra.

<sup>7</sup> Chjehe ra joajna Andrónico co Junias tti vinttequixin rajnana co tti vintteguiaxinhi ngain cárcel conixin janha. Cain nirepresentanté Jesucristo anto jian chonxin cayoi xí jihi, co jehe xa icha saho vitticaon xa ngain Jesucristo que janha.

<sup>8</sup> Chjehe ra joajna Amplias, xiamigona que janha anto rinaho que ditticaon xa ngain Jesucristo.

<sup>9</sup> Chjehe ra joajna Urbano, xicompañeroa na de ngain x̄é Jesucristo, cai chjehe ra joajna Estaquis, xiamigona que anto rinaho.

<sup>10</sup> Chjehe ra joajna Apeles, tti ocjoagoa na tsje ntiha ixin jehe anto jian ditticaon ngain Jesucristo. Cai chjehe ra joajna cain nifamilié Aristóbulo.

<sup>11</sup> Chjehe ra joajna Herodión, tti joixin de rajnana. Co cai chjehe ra joajna cain nifamilié Narciso que cain nimé ditticaon na ngain Jesucristo.

<sup>12</sup> Chjehe ra joajna Trifena co Trifosa, n̄hí que dinttenchehe x̄é Jesucristo. Chjehe ra joajna na Pérsida, n̄hí que ján na anto rinao na; jehe anto joinchehe x̄é Jesucristo cai.

<sup>13</sup> Cai chjehe ra joajna Rufo, tti anto jian ditticaon ngain Jesucristo, co cai janné tti cjoí inchin ná jannana janha.

<sup>14</sup> Chjehe ra joajna Ansíncrito, co Flegonte, Hermas, Patrobas, Hermes, conixin cain chojni que ditticaon Jesucristo nttiha.

<sup>15</sup> Chjehe ra joajna Filólogo, Julia, Nereo conixin n̄chichó Nereo, Olimpás conixin cain chojni que ditticaon ngain Jesucristo que te ngain nimé.

<sup>16</sup> Naná ra chjehe chó ra joajna jian. Cain chojni nttihi que ditticaon ngain Jesucristo roanha na joajna para ixin jaha ra.

<sup>17</sup> Hermanos, janha nttatsanha ñao ra que ttjiho ra cuidado de ngain tti chojni que nchechjian división co ttín na cosa que nchetjanji chojni. Cayoi cosa jiji ningaconhe tti jaha ra coangui ra de ixin Jesucristo. Jaha ra dačhjenda ra de ngain chojni mé.

<sup>18</sup> Ixin cain chojni que nchehe mé nchesayeha na Jesucristo, tti chonda cain joachaxin para ixin ján na, sino que chojni mé nchehe na inchin rinao cuerpoe na, co ncheyehe na chojni que nandá ttexinhi ditticaon ngain Jesucristo, conixin tti anto čhjoin que jehe na nichja na.

<sup>19</sup> Cainxin chojni ngoixin mundo nohe na quežén jaha ra vitticaon ra nchehe ra tti ndačo Jesucristo; mexinxin janha anto chahna jai, co janha rinaho que jaha ra sintte ra listo para sinchehe ra joxon cosa jian, pero que sincheha ra cosa jianha.

<sup>20</sup> Co Dios, tti danjo tti čhjoin que tonohé ansén chojni, mé tti toin sinchettegoa Satanás ngangui rottea na. Que Jesucristo, tti chonda cain joachaxin para ixin ján na, sinttanchaon ra.

<sup>21</sup> Nttihi Timoteo, tti xicompañerona de ngain xé Jesucristo, rroanha joajna para ixin jaha ra; cai Lucio, Jasón co Sosípater, tti nihoixin de ngain rajnana rroanha na joajna para ixin jaha ra cai.

<sup>22</sup> Janha que dinhi na Tercio, que rricjin na carta jiji para ixin Pablo, cai rriroanha joajna para ixin jaha ra de ngain nombré Jesucristo.

<sup>23</sup> Cai Gayo rroanha joajna para ixin jaha ra. Janha nttihi rrihi ngain nchiandoha jehe Gayo, tti nchia que Gayo nhecjen cain chojni que ditticaon ngain Jesucristo para que jehe na nchegonda na para servicio. Cai Erasto, tti tesorero de ngain ciudad jiji rroanha joajna para ixin jaha ra co cai tattita que dinhi Cuarto, tti ditticaon ngain Jesucristo, rroanha joajna para ixin jaha ra.

<sup>24</sup> Que Jesucristo, tti chonda cain joachaxin para ixin ján na, que jehe sinchenciaon nganji ra cainxin ra. Amén.

*Nttihi joexinxin joajna jiji*

<sup>25</sup> Co jai nttocoanxinhi na Dios, tti nchao icha sinttajian na de ixin tti joajna que danjo iná vida naroaxin que joajna mé tti janha ndachjan co nttacoán chojni de ixin Jesucristo. Co cai joajna mé xajeho palabra que Dios xaxaon icha saho que nonte rroguehe, pero desde mé joajna jiji vema joajna.

<sup>26</sup> Pero jai Dios, que jí para cainxin tiempo, jehe jinchenohe cain chojni joajna mé de ixin cain xón que dicjin profeté are saho. Jamé joinchehe Dios para que jai chojni de cain nación sitticaon na co sinchehe na tti ndacho jehe.

<sup>27</sup> ¡Jeho nacoa Dios, mé tti nohe cainxin cosa, co jehe tti jiquininxin tsosayehe para cainxin tiempo de ixin tti joinchehe Jesucristo! Amén.



**Tti jian joajné Jesucristo**  
**New Testament in Popoloca, San Marcos Tlalcoyalco**  
copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

**Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Popoloca, San Marcos Tlalcoyalco

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files  
dated 29 Jan 2022

a23ba35e-b016-5f67-a705-694e460cf18a